



C40
4514
151



C40-4514

了翁上座語不藏及不
家書單之於州紫雲山
我微安塔院庶府中永
為學子者不敢許出院內
當山三世鐵牛機謹誌



B 64853

阿毗曇毗婆沙論卷第六十六

迦旃延子造

北涼沙門浮陀跋摩共道泰譯

使健度十門品第四之十三

已說體性所以今當說何故各解脫解脫是何義答
曰背棄義是解脫義問曰若背棄義是解脫義者何
等解脫背棄何處心答曰初解脫第二解脫背棄色
愛心第三解脫背棄不淨心空處解脫背棄下地法
乃至非想非非想處解脫亦背棄下地法滅受想解
脫背棄一切有緣心是故背棄義是解脫義

經

阿毗曇毗婆沙論卷第六十六

尊者和須蜜說曰得解義是解脫義心於煩惱得解得淨故名解脫尊者佛陀提婆說曰虛想觀得解故名解脫

界者初解脫第二第三解脫在色界空處識處無所有處解脫有漏者在無色界無漏者是不繫非想非非想處解脫滅受想解脫在無色界地者初解脫第二解脫在未至中間及初禪第二禪上地亦有與此相似善根而不立解脫所以者何爲對治欲界色愛故立初禪不淨解脫對治初禪色愛故立第二禪不淨解脫第二禪無色愛故第三禪不立不淨解脫第

三禪無色愛故第四禪不立不淨解脫淨解脫在第四禪下地亦有與此相似善根而不立解脫所以者何淨解脫對治不淨不爲不淨所摧伏若當下地立淨解脫者則爲不淨所摧伏空處解脫在空處問曰空處法何者是解脫何者非解脫答曰離第四禪欲時九無礙入解脫死時善空處非解脫餘善空處是解脫識處解脫在識處問曰識處法何者是解脫何者非解脫答曰離空處欲時九無礙入解脫死時善識處非解脫餘善識處是解脫無所有處解脫在無所有處問曰無所有處法何者是解脫何者非解脫

答曰若離識處欲時九無礙八解脫死時善無所有處非解脫餘善無所有處是解脫非想非非想處解脫在非想非非想處問曰非想非非想處法何者是解脫何者非解脫答曰離無所有處欲時九無礙八解脫死時善非想非非想處非解脫餘善非想非非想處是解脫滅受想解脫在非想非非想處所依者初解脫第二第三解脫依欲界身滅受想解脫依欲色界身餘解脫依三界身行者初解脫第二解脫行不淨行淨解脫行淨行四無色解脫行十六行或行餘行滅受想解脫不行行緣者初解脫第二第三解

脫緣欲界爲緣何法答曰緣色入空處解脫緣四無色及彼因彼滅一切比智分及比智非數滅四無色非數滅緣一切虛空若一相若異相識處解脫緣三無色及彼因彼滅一切比智分及比智非數滅三無色非數滅緣一切虛空若一相若異相無所有處解脫緣二無色及彼因彼滅一切比智分及比智非數滅二無色非數滅緣一切虛空若一相若異相非想非非想處解脫緣非想非非想處及彼因彼滅一切比智分及比智非數滅一無色定非數滅緣一切虛空若一相若異相滅受想解脫無所緣念處者初解

脫第二第三解脫與身念處俱四無色解脫與四念處俱滅受想解脫若以親近念處性念處者則不與俱若以緣念處者是法念處智者初解脫第二第三解脫與等智俱空處識處無所有處解脫與六智俱除法智他心智非想非非想處解脫與等智俱滅受想解脫不與智俱定者初解脫第二第三解脫非想非非想處解脫滅受想解脫不與定俱空處識處無所有處解脫或與定俱或不與定俱根者初解脫第二解脫與喜根捨根相應滅受想解脫不與根相應餘解脫與一捨根相應世者在三世緣三世者初解

脫第二第三解脫過去緣過去現在緣現在未來必生者緣未來不生者緣三世四無色解脫緣三世及非世滅受想解脫無所緣善不善無記者是善緣善不善無記者初解脫第二第三解脫緣善不善無記四無色解脫緣善無記滅受想解脫無所緣三界繫及不繫者三是色界繫二是無色界繫餘三有漏者無色界繫無漏者不繫緣三界繫及不繫者三緣欲界繫四緣無色界繫及不繫一是不緣學無學非學非無學者五是非學非無學三是學無學非學非無學緣學無學非學非無學者三緣非學非無學四緣

三種一無緣見道斷修道斷不斷者五是修道斷三
若有漏者是修道斷無漏者不斷緣見道修道斷不
斷者三緣修道斷四緣三種一無所緣緣名緣義者
三緣義四若說無色界有名者緣名緣義若說無名
者緣義一無所緣緣自身他身非身法者初解脫緣
自身他身第二第三解脫緣他身四無色解脫緣自
身他身及非身法一無所緣爲是方便得爲是離欲
得者滅受想解脫是方便得餘是離欲得亦是方便
得若如初禪者離欲界欲時得乃至若在非想非非
想處者離無所有處欲時得方便得者以方便現在

前佛不以方便現在前辟支佛以下方便聲聞或以
中或以上方便爲是本得爲是未曾得者滅受想解
脫是未曾得餘是本得亦是未曾得聖人佛法凡夫
是本得未曾得餘凡夫是本得八解脫廣說如上觀
色是色是初解脫者現見修內色想不離內色想觀
外色若青若膿若膻若脹若骨若骨鎖是名初解脫
初者次第數在初故名初隨順次第義在初故名初
復次次第入定時數在初故名初隨順次第義入定
時在初故名初解脫者入是定時善色受想行識是
名解脫內無色想觀外色者不現見修內色想離內

色想觀外色若青廣說如上名第二解脫第二義
解脫義亦如上說問曰爲觀外色時亦觀內無色想
爲觀外色已復觀內無色想耶若觀外色時亦觀內
無色想者云何一心緣於二法若能緣二法亦可緣
多法我觀外色已復觀內無色想者此中所說云何
通如說內無色想觀外色答曰應作是說若觀外色
時是時不觀內無色想問曰若然者此中所說云何
通如說內無色想觀外色答曰行者有如是期心故
作如是說行者作如是期心我不觀內色但觀外色
有如是期心故佛作是說復次此中說行者先分別

觀察時故佛作是說復次以義定故若觀內無色想
則定觀外色若觀外色則定觀內無色想復次此中
說善根及方便內無色想是善根方便觀外色者是
滿足善根復次內無色想者是期心觀外色是所緣
淨解脫身作證得成就是名第三解脫問曰淨解脫
爲觀色是色爲內無色想觀外色耶若觀色是色者
初解脫第三解脫有何差別若內無色想觀外色者
第二解脫第三解脫有何差別答曰應作是說內無
色想觀外色問曰若然者第二解脫第三解脫有何
差別答曰名卽差別是名第二解脫是名第三解脫

復次第二解脫在初禪第二禪第三解脫在第四禪
復次第二解脫在內道外道身中淨解脫惟在內道
身中復次第二解脫行不淨行第三解脫行淨行復
次第二解脫對治色愛不淨第三解脫對治不淨復
次第二解脫不多所作不多用功而得淨解脫多有
所作多用功而得復次第二解脫體明淨緣不明淨
體勝妙緣不勝妙淨解脫體勝妙緣勝妙體明淨緣
明淨淨解脫緣淨問曰行者何故淨解脫觀時緣淨
答曰欲試善根故行者作是念我作不淨觀煩惱不
生未知此善根爲滿足不復試觀淨煩惱亦復不生

便知善根已得滿足復次行者觀不淨故心劣心劣
故不能修勝進善根復以淨觀令心欣踊能修勝進
善根猶塚間比丘常觀死屍故心則劣弱不能修勝
進善根便從住處往清淨妙好河池園林之中觀世
種種勝妙之事心生欣踊然後能生勝進善根彼亦
如是復次行者作不淨觀心常愁感無歡喜時則不
能修勝進善根若以淨觀捨不淨心能修勝進善根
復次欲現自心堅牢故彼作是念我心堅牢乃至作
淨觀猶不生煩惱復次欲現善根有大勢用故彼作
是念此善根有大勢用乃至緣淨法猶不生煩惱復

次欲現自心堅牢亦現善根有大勢用故彼作是念
我心堅牢善根有大勢用觀淨境界猶不生煩惱復
次淨解脫非凡夫常人能起若行者好喜淨潔從摩
菟摩天中來曾聞有一比丘以日入時往詣佛所從
佛索房爾時佛告阿難汝爲此比丘求住房舍爾時
阿難示彼比丘房時彼比丘語阿難言汝可極淨掃
灑此房懸繒幡蓋散種種華燒衆名香敷軟牀褥安
置好枕爾時阿難具以是事往白世尊佛告阿難如
彼比丘所須悉辦具之爾時阿難卽爲辦具時彼比
丘入此房中坐其牀座以夜初分起淨解脫因是次

第得盡諸漏成阿羅漢獲得神通晨朝以神足力忽
然而去爾時阿難晨朝詣彼比丘所入房但見嚴正
牀座不見其人見是事已往詣佛所而白佛言彼比
丘嚴正牀座不知何去佛告阿難汝於彼比丘莫生
輕心彼比丘昨夜起淨解脫得盡漏成阿羅漢獲得
神通以神通力忽然而去阿難當知彼比丘者好喜
淨潔從摩菟摩天中來若不得如是清淨房舍牀座
臥具者則不能起是善根以是事故知淨解脫非凡
常人能起若好喜淨潔從摩菟摩天中來者則能起
淨解脫第二義解脫義如上說空處識處無所有處

非想非非想處解脫廣說如四無色定滅受想解脫
滅盡定處當廣說第八義解脫義如上說

問曰何故禪中餘善根立解脫無色定中盡立解脫
耶答曰以禪是麤現見了了故餘善根立解脫無色
定是細不現見不了了故盡立解脫復次禪中有種
種不相似善根故餘善根立解脫無色定無種種不
相似善根故盡立解脫復次禪中多諸功德善利故
餘善根立解脫無色定無多功德善利故盡立解脫
復次禪能徧照緣於上地亦緣下地緣於自地餘善
根立解脫無色定不能徧照能緣上地自地不緣下

地是故盡立解脫復次禪解脫是有漏無色定解脫
是有漏無漏如是因論生論何故禪中解脫是有漏
無色定中解脫是有漏無漏耶答曰先所說四答此
中應說餘有一異答禪解脫是虛觀無色定解脫是
實觀

佛經說解脫名方問曰何故佛說解脫名方答曰爲
教化故受化者應聞說解脫名方乃得悟解是故佛
以方名說解脫如餘經說諦名方有受化者應聞說
諦名方乃得悟解是故佛說諦名方此亦如是問曰
解脫與方有何相似答曰入此相似解脫有八方亦

有八問曰方應有十謂四方四維及上下何故說八
答曰如調象法故應有八調象之法必向四方及四
維不能令其向於上下譬如以方故調於龍象如是
以方便故得解脫尊者瞿沙作如是說調象解脫有
三事同三事異三事同者一以方故龍象可調解脫
亦爾以除障故衆生能得解脫二如調龍象趣於一
方時不能復趣餘方佛教衆生解脫之法亦復如是
得一解脫時無二無多三如調龍象趣一方時便遠
餘方世尊爲衆生說解脫法亦復如是一解脫現在
前餘解脫便遠三事異者一如調龍象若不趣方則

不能調佛說解脫法住一處而無所趣能令衆生得
解脫法二如調龍象趣一方時不能復趣餘方佛說
解脫法不爾能於一時說八解脫法而令衆生皆得
悟解三如調龍象趣一方時皆遠餘方佛說解脫法
不爾爲諸衆生說一解脫法而作方便令餘解脫法
皆近復次此中說最勝調御法曾聞拘薩羅王波斯
匿勅捕象人使捕野象若得象者來白於我時捕象
人聞王教勅卽捕野象來白王言大王當知今已捕
得野象王聞是語勅調象師令調野象若善調伏便
來白我時調象師受王教勅卽以種種苦切之事調

於野象能令調伏如舊調象時調象者知象已調來
白王言大王當知先勅調象今已善調大王應知是
時爾時波斯匿王與調象師共乘此象出田遊獵時
象見雌象羣欲心熾盛而便馳走趣雌象羣時調象
者欲迴制之盡其方便不能令迴王及調象者攀樹
而下得自濟命還詣宮城語調象者汝以不調之象
令我乘之法應爾耶時調象者而白王言唯願大王
莫見瞋責此象實調當使大王後驗此事時象欲心
息已便還王宮時調象者將象詣王燒熱鐵丸置其
頂上於其耳中而語之言此是最後調汝不動之法

汝若堪忍則善若不堪忍當復以前苦切之事次第
調汝象聞是語其身不動其猶如山時熱鐵丸燒象
頂如燒樺皮王見是事怪未曾有卽勅象師去鐵丸
語調象人言汝今調象能令如此前何故爾調象人
答王言我能調身不能調心時王復問調象人言世
間頗有能調心者不時調象人答王言有佛世尊住
舍衛國祇洹精舍善能調伏衆生身心爾時波斯匿
王作是思惟欲得見佛卽與調象人共乘本象往詣
波斯匿王來以隨宜方便爲王說法非聲聞辟支佛

所知境界時世尊告諸比丘如調象人善調象已趣於一方若東若西若南若北調牛之人善調於牛調馬之人善調於馬趣於一方廣說如上比丘當知無上調御師善調於人能趣諸方何者是方觀色是色乃至廣說解脫以是事故知此經說最勝調御

經說有一比丘往詣佛所頭面禮足却坐一而面白佛言世尊有明界有淨界有空處界有識處界有無所有處界有非想非非想處界有滅界世尊爲以何故立此諸界佛告比丘以闇故立於明界以不淨故立於淨界以色故立空處界以邊故立識處界以所

有故立無所有處界以實身故立非想非非想處界以滅實身故立滅界問曰彼比丘爲問佛何義佛答彼比丘何義答曰彼比丘以覆相問八解脫義佛亦以覆相答八解脫義明界者是初二解脫淨界者是淨解脫空處界者是空處解脫識處界者是識處解脫無所有處界者是無所有處解脫非想非非想處界者是非想非非想處解脫滅界者滅受想解脫問曰彼比丘何故以覆相問佛八解脫義答曰彼比丘少欲知足覆藏善法不欲以已功德顯示他人故問佛何故以覆相說八解脫答曰欲滿彼比丘心所願

故彼比丘心作是念若佛以覆相爲我說八解脫者則善佛是滿他願者善知根性者爲彼比丘心所念故覆相而說比丘當知明界是初二解脫爲闇故者闇者是欲界色愛初二解脫是彼對治以彼色愛故立二解脫以不淨故立淨界者不淨是初二解脫淨解脫是彼對治以彼故立淨解脫以色故立空處界者色是第四禪空處解脫是彼對治以彼故立空處解脫以邊故立識處界者邊是空處識處解脫是彼對治以彼故立識處解脫問曰空處何故名邊答曰色盡處是色邊故名邊以所有故立無所有處界者

所有者是識處以有無邊行故無所有處解脫是彼對治以彼故立無所有處解脫以實身故立非想非非想處界者實身者是無所有處非想非非想處解脫是彼對治以彼故立非想非非想處解脫以滅實身故立滅界者滅實身名非想非非想解脫滅受想解脫是彼對治以彼故立滅受想解脫問曰非想非非想處何故名滅實身答曰實身是無所有處非想非非想處是彼對治故言滅時彼比丘聞佛所說歡喜隨順復更問佛世尊明界乃至滅界爲以何定而得佛告比丘明界乃至滅界以行定得或有說者彼

比丘問次第得或有說者彼比丘問斷若作是說彼
比丘問次第得者得定是初禪邊乃至無所有處邊
初禪邊者離欲愛得初二解脫第四禪邊者離三禪
欲得淨解脫空處邊者離第四禪欲得空處解脫識
處邊者離空處欲得識處解脫無所有處邊者離識
處欲得無所有處解脫此中餘者非想非非想處解
脫滅受想解脫佛告比丘非想非非想處解脫以勝
行定得勝行定者是非想非非想處邊以勝行定離
無所有處欲得非想非非想處解脫滅界者以滅受
想處定得滅受想定者是非想非非想處定所以者

何入定出定心在彼處故若作是說彼比丘問斷者
行定是有漏無漏對治是故能離欲界乃至離無所
有處欲此中餘者非想非非想處解脫滅受想解脫
比丘非想非非想處解脫以勝行定得勝行定者是
無漏對治世俗道於離非想非非想處衰退轉還是
故以無漏對治離非想非非想處欲滅界者以滅實
身得滅實身者是滅盡涅槃以滅盡涅槃故而修滅
受想定比丘以闍故立明界者闍是境界闍初二解
脫是彼對治復有說者彼比丘離三界欲以覆相廣
略問佛佛亦以離三界欲覆相廣略而答明界者是

現離欲界欲方便淨界者是略現離欲界欲空處界者是略現離色界欲識處界無所有處界非想非非想處界是廣現離無色界欲滅界是略現離無色界欲比丘以闇故立明界者闇者是勝妙五欲愛初二解脫是彼對治譬喻者作如是說彼比丘以覆相問八種定佛亦以覆相說八種定解此經者有增有減於此經應作而不作不應作而作應說廣界而不說是減不應說滅界而說是增今當離於增減而解此經明者是初禪二禪淨界者是第三第四禪空處界者是空處識處界者是識處無所有處界者是無所

有處非想非非想處界者是非想非非想處比丘以闇故立明界者闇是諸蓋初禪二禪是彼對治爾時比丘聞佛所說歡喜隨順而去

有滅盡定問曰何故作此論答曰爲止併義者意故或有說者滅定有心彼作是說無有無色衆生無心之定如尊者佛陀提婆作如是說若滅定無心者不應說有從彼定起者是名爲死不名爲定爲止如是說者意故亦現離無所有處欲非想非非想處心次第起彼定現在前是故尊者和須蜜作如是說云何滅定答曰離無所有處欲作休息想心令心心數法

滅以是事故根捷度作如是說入滅定時爲滅幾根
答曰七謂意根捨根信等五根何繫心心數法滅答
曰無色界繫總而言之是無色界繫而是非想非非
想處心心數法滅從滅定起時幾根現在前答曰或
七或八有漏心七無漏心八若從彼定起心是非想
非非想處心起七根現在前謂意根捨根信等五根
若是無所有處心起八根現在前上所說七知根知
已根若一現在前何繫心心數法現在前答曰有漏
心是無色界繫無漏心是不繫若出定心是非想非
非想處者是無色界繫心心數法現在前若出定心

是無所有處者起不繫心心數法現在前以是事故
明滅定無心所以者何入定時說滅出定時不說滅
出定時說現在前不說滅以是事故而作此論

問曰滅定體性是何答曰是心不相應行陰界者在
無色界地者在非想非非想處地非下地問曰何故
下地無滅定答曰非其田器乃至廣說復次彼定無
心心斷起現在前非想非非想處隨順斷心問曰云
何非想非非想處隨順斷心答曰若欲入彼定者欲
界善心次第起初禪心現在前乃至無所有處心次
第起非想非非想處心現在前非想非非想處心心

數法有上中下捨上心起中心捨中心起下心捨下心在彼定是故非想非非想處隨順斷心猶如女人紡毳隨轉隨績毳若盡時更不轉績彼亦如是復次二滅心定俱在二界邊無想定在色界邊滅定在無色界邊復次此二定俱在二地邊無想定在第四禪地邊滅定在非想非非想處地邊復次無想定在四大造色邊滅定在心心數法邊復次一切地盡有二種過一過欲二過住處過初禪欲者以自地無漏過初禪住處者以第二禪乃至過無所有處欲者以自地無漏亦以下地過無所有處住處者以非想非非

想處過非想非非想處欲者以下地無漏過非想非非想處住處者以滅定若當下地有滅定者下地或有二種過或有三種過非想非非想處惟有一種過欲令無如是過故不說下地有滅定復次滅定以二事故立解脫一以背捨一切緣法二以滅最後邊心若下地有滅定者不名背捨一切心所以者何不盡背捨一切心法故亦非滅最後邊心所以者何滅中心故復次此定是次第定非想非非想處心次第生此定以如是事故下地無滅定

阿毗曇毗婆沙論卷第六十六

音釋

膿奴冬切 脞脞匹絳切 塚知隴切 屍書之切 繒疾陵切
 也如欲切 樺胡化切 紡紡如兩切 績也 績也
則歷切

金璽善女人王門姜氏施贊刻此
 阿毘曇毘婆沙論第六十六卷計字六千六百
 零八個該銀二兩九錢七分四厘
 上薦先夫君產生居士用資後福早證菩提者
 崇禎壬申歲季春月顧龍山識

阿毗曇毘婆沙論卷第六十七

迦旃延子造

北涼沙門浮陀跋摩共道泰譯

使健度十門品第四之十四

云何滅定答曰佛經說過一切非想非非想處問曰
 滅定是非想非非想處法何以言過一切非想非非
 想處答曰雖是彼處法以寂靜故言過猶如村落阿
 練若處復次非想非非想處有二種一有心二無心
 過一切非想非非想處者過於有心非想非非想處
 滅受想解脫身作證得成就者是說無心非想非非

想處如有心無心相應不相應有依無依有行無行
有勢用無勢用有緣無緣當知亦如是復次非想非
非想處有二種謂染污不染污過一切非想非非想
處者過染污非想非非想處滅受想解脫身作證得
成就者是說不染污非想非非想處如染污不染污
見道斷修道斷當知亦如是復次非想非非想處有
二種謂本得未曾得過一切非想非非想處者過本
得非想非非想處滅受想解脫身作證得成就者是
未曾得非想非非想處如本得未曾得共不共離欲
得方便得當知亦如是復次此中說次第過諸地故

先次第過諸地欲後過有心住非想非非想處問曰
無學人可爾所以者何無學人於非想非非想處有
二種過一離欲過二住處過學人於非想非非想處
無二種過過一切非想非非想處云何可爾答曰一
切有二種有少分一切有一切一切此中說少分一
切復次此中說住處過學人雖無非想非非想處修
道所斷欲過而有住處過復次此說須臾過彼須臾
滅非想非非想處有心次生非想非非想處無心滅
受想定身作證得成就者問曰入彼定時餘心心數
法盡滅何故世尊但說滅受想耶答曰譬喻者說彼

定有心彼作是說入彼定時唯此二法滅問曰我不問彼我問說此言無心者何故爾耶答曰佛說受想滅當知餘心心數法亦滅復次以此二法名義勝故彼心聚中誰爲最勝此二法最勝故佛說復次此現初門現略現始入法故心心數法有二種或是根性或非根性若說受當知已說根性若說想當知已說非根性者如根性非根性明非明勝不勝妙不妙當知亦如是復次此二法於二界中極爲行者而作疲勞受於色界想於無色界是故世尊說此二法復次以此二法於二界中勝故受於色界中勝想於無色

界中勝復次以此二法能生二種惱謂受惱見惱受能生愛惱想能生見惱復次此二法能起二種鬪諍根本受能起貪著欲愛繫縛鬪諍根本想能起見愛貪著繫縛鬪諍根本如二鬪諍根本二邊二箭二戲論二我當知亦如是復次因樂受故生顛倒想令諸衆生於生死中受大苦惱是故世尊說滅此二法復次行者憎惡此二法故起滅定如施設經說行者以何方便求滅定答曰初行者欲令諸行更無所作更無所思令我受想不生已生者滅未生受想令不生已生受想令滅是滅於此滅法無障礙不問他得自

在身作證是名定以是事故世尊說滅此二法問曰
滅之與定有何差別答曰滅是一剎那定是久相續
問曰心不動故名定此中心斷無心云何名定答曰
不動有二種一心不動二四大不動此中雖斷心不
動而四大不動相續生以四大不動故名定問曰二
無心定何故滅定立解脫無想定不立耶尊者波奢
說曰佛決定知法相亦知勢用餘人不知若法有解
脫相者立解脫無解脫相者不立復次若定是內道
法立解脫若定是外道法不立解脫如內道外道聖
人凡夫背煩惱起煩惱背熾然起熾然說亦如是復

次捨我見起無我見身中可得者立解脫若起我見
捨無我見身中可得者不立復次若捨身見起空現
在前身中可得者立解脫若不起空現在前起身見
者不立復次先作是說以二事故滅定立解脫一捨
一切緣法二滅最後邊心無想定無此二事故不立
解脫復次若更不生諸界諸生諸趣身中可得者立
解脫若更生諸界諸生諸趣身中可得者不立復次
背棄義是解脫義得滅定者背捨諸界諸生諸趣增
長生死法無想定不爾以如是事故二無心定滅定
立解脫無想定不立問曰滅定無想定有何差別答

曰名卽差別是名滅定是名無想定復次界亦差別無想定色界繫滅定無色界繫復次地亦差別無想定在第四禪地滅定在非想非非想地復次身亦差別無想定在凡夫身滅定在聖人身復次凡夫人入無想定作離想聖人入滅定作休息想復次凡夫人入無想定欲滅於想聖人入滅定欲滅受想復次凡夫人入無想定滅色界繫心心數法聖人入滅定滅無色界繫心心數法復次凡夫人入無想定滅第四禪地心心數法聖人入滅定滅非非想地心

心數法復次凡夫人入無想定得色界報聖人入滅定得無色界報尊者和須蜜說曰無想定滅定有何差別答曰一是無想定二是滅定復次界亦差別無想定是色界繫滅定是無色界繫餘廣說如上復次凡夫人入無想定得無想果聖人入滅定得非想非非想處果復次凡夫人入無想定得色界繫報學人入滅定得無色界繫報無學人入滅定得餘依無想定滅定是謂差別問曰何故佛經說八解脫二解脫說身作證耶答曰八解脫盡應說身作證如大因緣經說八解脫身作證得成就問曰何故一經說八解

脫身作證多經說二解脫身作證耶答曰此二解脫
多有所作多用功而得故復次以名義勝故八解脫
中何者最勝此二解脫復次此二解脫俱在界邊淨
解脫在色界邊滅受想解脫在無色界邊復次此二
解脫俱在地邊淨解脫在第四禪地邊滅受想解脫
在非想非非想地邊復次淨解脫盡四大造色而立
滅受想解脫盡心心數法而立故復次淨解脫取色
淨相而不生煩惱是故佛說身作證得成就滅受想
解脫無心在身不在心以身力起現在前不以心力
是故佛說身作證得成就復次經說八解脫身作證

者皆以此二解脫故得成就者得成就有多處說或
說色陰少分是得成就或說善五陰或說善四陰或
說心不相應行陰少分或說滅盡涅槃說色陰少分
得成就者如偈說

汝於勝慧法 得成就於戒 一切皆賢善
廣有諸珍寶

善五陰者如說得成就初禪乃至第四禪善四陰者
如說得成就空處乃至非想非非想處心不相應行
陰少分者如此中說滅受想解脫滅盡涅槃者如說
得成就滅盡涅槃問曰滅定有幾種答曰或有說者

有四種一具縛人所起滅定二斷上三種結三斷中
三種結四斷下三種結復有說者此定有四種非具
縛起者是斷六種七種八種九種結起者復有說者
此定有九種斷上上結起者乃至斷下下結起者復
有說者此定有十種具縛起者斷上上結起者乃至
斷下下結起者問曰若具縛人能起滅定者凡夫人
亦能起答曰具縛人有二種一見道所斷具縛二修
道所斷具縛若無非想非非想處見道所斷具縛有
修道所斷具縛者能起滅定若有二具縛者則不能
起評曰應作是說滅定有十一種具縛人起滅定者

斷上上結起者乃至斷下下結起者時解脫轉根作
不動起者問曰若具縛者所起滅定乃至時解脫轉
根作不動者所起滅定卽是具縛者所起滅定耶答
曰或有說者卽是問曰若然者云何有十一種答曰
以十一時起故有十一種復有說者具縛者所起異
乃至不動法所起異問曰若然者具縛者所起乃至
不動者所起有何差別答曰具縛者所起後斷一種
結所起者於前具縛者所起得不在身中成就不現
前行斷一種結所起者得在身中成就現在前行乃
至不動法所起於時解脫所起得不在身中成就不

現前行不動法所起得在身中成就現在前行
問曰此定爲有上中下不耶若有上中下者施設經
說云何通如說滅法無有差別若無上中下者佛所
有定卽是聲聞辟支佛定也答曰應作是說此定無
上中下問曰若然者施設經說善通滅法無差別故
佛所有定卽是辟支佛聲聞定也答曰如佛心斷入
此定辟支佛聲聞心斷入此定等無差別而方便有
差別佛不以方便起此定現在前辟支佛以下方便
聲聞或以中或以上方便評曰應作是說此定有上
中下問曰若然者佛定異辟支佛聲聞定異此說善

通施設經說云何通如說滅法無有差別答曰以住
心故施設經說滅法無有差別定是有爲故應有上
中下所以者何一切有爲法有上中下相

問曰此定體爲有幾耶答曰或有說者體有一若滅
現在前則無心問曰若滅剎那現在前卽彼剎那名
無心耶答曰如是若滅剎那現在前卽彼剎那名無
心如一受剎那卽彼剎那名爲有受一想剎那卽彼
剎那名爲有想一識剎那卽彼剎那名爲有識彼亦
如是若一剎那滅卽彼剎那名無心復有說者此定
體有十一所以者何彼滅十大地及心故復有說者

體有二十一種所以者何彼滅十大地十善大地及
心評曰應作是說隨滅幾種心數法彼定體亦有爾
許種此是定體定相云何答曰體卽是相相卽是體
諸法不可離體別說相尊者須審說曰心法解脫
是其相

問曰此定不能斷結何故說名心法解脫答曰此說
須更斷有緣法令不行名解脫而此定不能斷結復
有說者若法想微細爲其作因微微作次第不與此
法俱而成就是解脫問曰此爲說何義答曰或有說
者此中說定若作是說此中說定者想微細爲其作

一因謂相似因與微微作一因謂相似因微細亦作
次第緣若作是說此中說定者若法想微細爲其作
因微微爲其作次第者不應說不俱所以者何彼人
起定現在前故應說成就所以者何彼人成就定故
復有說者此中說出定心若作是說此中說出定心
者想微細爲其作一因謂相似因微細亦作次第緣
若作是說此中說出定心者若法想微細爲其作因
微微作次第應說不俱所以者何入定時不起出定
心現在前故應說成就所以者何彼人成就出定心
故以是事故知彼人本得出定心復有說者此中說

入定心若作是說此中說入定心者想與定作一因謂相似因微細與定作一因謂相似因亦作次第緣若作是說此中說入定心者應作是說想微細與定作因定與微細作次第應說不俱所以者何在定時不起入定心現在前應說成就所以者何在定時成就入定心故問曰此中何者是想何者是微細何者是微微答曰或有說者空處識處是想無所有處是微細非想非非想處是微微復有說者空處識處無所有處是想非想非非想處是微細若心心數次第入定者是微微復有說者非想非非想處亦是想亦

是微細亦是微微所以者何非想非非想處有上中下上者是想中者是微細下者是微微問曰想微細微微有何差別答曰或有說者名卽差別是名爲想是名微細是名微微復次上者是想中者是微細下者是微微復次想微細能令未來無漏道修微微不修復次想微細現在前時三念處若一念處現在前未來四念處修微微現在前時法念處現在前未來修三念處除身念處復次想微細或會得或不曾得微微是會得問曰此中因論生論何故入定心或會得或不曾得出定心惟會得答曰入定心難得多有

所作多用功乃得出定心易得不多有所作不多用
功而得是故惟是曾得復次入定心能增益定令定
相續出定心不增益定令定衰退不相續復次入定
心是有漏或是曾得或未會得出定心是有漏無漏
故惟是曾得此中因論生論何故入定心有漏出定
心有漏無漏耶答曰隨順斷心故入定心不堅牢羸
劣如腐種子不能生相續法隨順斷心出定心堅牢
不羸劣不如腐種子能生相續法不隨順斷心復次
入定心以定爲寂滅無漏心不計有法是寂滅復次
此是次第定非想非非想處心次第起此定最後無

漏在無所有處

問曰入定心爲何所緣出定心爲何所緣答曰入定
心緣定出定心亦緣定問曰若入定心緣定出定心
亦緣定者何不入定時出定出定時入定耶答曰入
定時期心欲入出定時期心欲出復次入定心緣未
來定出定心緣過去定問曰入定心緣未來定時爲
何所緣答曰或有說者緣初刹那復有說者緣隨起
幾所定現在前評曰應作是說入定心緣未來定則
不可知爲緣何法爲不緣何法所以者何未來法是
亂法多剎那無次第以總緣故言緣未來定問曰出

定心緣過去法時爲何所緣答曰或有說者緣最後
剎那復有說者緣隨所起幾所定現在前評曰應作
是說出定心緣過去定則不可知爲緣何法爲不緣
何法所以者何過去法有多剎那故

問曰入滅定時滅何等心過去耶未來耶現在耶若
滅過去者過去已自滅若滅未來者未來未生若滅
現在者現在不住若定不滅彼亦自滅答曰應作是
說滅未來者問曰未來法未生云何可滅耶答曰行
者住現在世遮住未來心令不生故言滅譬如城邑
若斷道閉門豎於高幢不令人出入則名爲救彼亦

如是復有說者滅未來現在心問曰行者住現在世
遮住未來心使不生言滅可爾現在法不住若定不
滅彼亦自滅云何言滅答曰先現在滅心心數法令
有緣法相續而滅今現在滅心心數法令有緣法不
相續而滅皆是定力

問曰出定時何心心數法現在前答曰或有說者先
所遮住未來心心數法復有說者起未來心心數法
現在前所遮住者在不生法中評曰應作是說起
未來心心數法但不可知爲起何心爲不起何心所
以者何未來法是亂是多剎那是無次第

問曰此定爲有過去本得未來修不耶答曰或有說者無過去本得亦無未來修如天眼天耳若作是說此定無本得無未來修者定初剎那成就現在定第二剎那等成就過去現在出定成就過去定復有說者此定有過去本得有未來修如念前世智他心智若作是說此定有過去本得未來修者定初剎那成就未來現在定第二剎那等成就三世出定成就過去未來定評曰應作是說此定無過去本得亦無未來修若此定有過去本得未來修者若退此定還起此定應得本定而不爾若退此定還得此定名得未曾得定如不破戒而還家者還復出家名得未曾得戒彼亦如是

問曰於何處起此定答曰欲色界非無色界初在欲界若於欲界起滅定於此定退命終生色界中能起此定餘者不能何以知之經說尊者舍利弗語諸比丘諸長老當知若比丘戒具足定具足慧具足者能數數入出滅受想定若於現法及死時不得阿羅漢果身壞命終過搏食諸天生摩菟摩身天中復於彼處數數出入滅受想定此是實知見有如此事爾時長老優陀夷在彼會中語尊者舍利弗言尊者舍利

弗彼比丘生摩鬘摩身天中數數入出滅受想定無
有是處第二第三說亦如是問曰何故長者優陀夷
三違尊者舍利弗所說耶答曰長老優陀夷所疑非
無處所彼作是念若得此定者必離無所有處欲命
終應生非想非非想處彼處不能起滅定亦不解尊
者舍利弗意問曰彼尊者舍利弗有何意耶答曰尊
者舍利弗說生色界阿那含長老優陀夷說生無色
界者是以違之尊者舍利弗說退阿那含長老優陀
夷說不退阿那含是以違之問曰尊者舍利弗何故
不爲長老優陀夷解此義耶答曰尊者舍利弗作是

念我不能除此愚人深著之心復次尊者舍利弗有
如是想欲爲解說以優陀夷三違此言故此心便息
如箭喻經說爾時有衆多增上慢比丘皆於佛前自
說聖利我生已盡乃至廣說佛作是念我今當爲說
斷慢法以諸比丘數數自說聖利故此心便息佛世
尊有徧大悲欲說法心猶尚有息何況尊者舍利弗
耶復次尊者舍利弗作是念此所說事必聞於佛佛
以此事當呵責優陀夷及長老阿難當使此辱經歷
千載令無智者不違智者之言爾時舍利弗作是念
此比丘三違我所說諸梵行比丘亦無讚歎我所說

石我今應往詣世尊所爾時尊者舍利弗往詣佛所到已頭面禮足却坐一面語諸比丘諸長老當知若比丘戒具足乃至廣說爾時長老優陀夷在彼會中語尊者舍利弗言乃至無有是處爾時尊者舍利弗作是念今此比丘於世尊前違我所說諸梵行比丘亦無稱讚我所說者我今應當默然爾時舍利弗即便默然爾時佛告優陀夷言汝意以何是摩訶摩身天耶以非想非非想天是耶答言如是佛告言汝愚人無眼何故與上座比丘論甚深阿毗曇爾時世尊現前呵責優陀夷即便告長老阿難言汝見上座比丘

爲他所惱無有悲心於彼愚人而不呵責爾時世尊呵優陀夷即便還精舍入於禪定問曰長老優陀夷有過故世尊呵之長老阿難復有何過而被呵耶答曰優陀夷是阿難弟子是故世尊告於阿難汝應教勅復次優陀夷是長老阿難攝眷屬人是故世尊告言汝應教勅復次長老阿難是維那佛告阿難汝爲維那云何不知如法說者非法說者復次此論說甚深阿毗曇事非多人所知惟佛尊者舍利弗能知長老阿難以多聞力故能知以阿難知此法故不稱讚上座比丘所說不隨如法衆有如是過故世尊責

之以是事知初起滅定必在欲界若於欲界起滅定
退此定已生色界中還起此定餘則不能問曰何故
生色界中能初起禪無色定不初起滅定耶答曰禪
以三事故能起一以因力二以業力三以法應爾力
以因力者過去近生曾起滅此禪以業力者作決定
業必生彼處法應爾力者世界壞時下地衆生必生
上地無色定以二事故能起一以因力二以業力無
法應爾力以因力者過去近生曾起滅無色定以業
力者作決定業必生彼處無法應爾力者無色界中
無世界成壞滅定以一事故能起謂解脫者彼解脫

者爲何處最勝謂在欲界中不以因力所以者何未
曾起此定故非以業力所以者何彼定性非業故非
法應爾力所以者何無色界無世界成壞故問曰何
故欲色界起此定現在前非無色界耶答曰命根依
二事存謂依色依心此定無心心斷故起現在前欲
色界中起此定時心雖斷命根依色而存無色界無
色依心故命存若無色界起此定者心斷命則斷是
名爲死不名爲定

問曰若起此定已於此定退命終爲生空處識處無
所有處不答曰不生所以者何其所應生若能起此

定處若能受此報處色界中雖不受此定報能起此定非想非非想處雖不能起此定而受此定報處空處識處無所有處不能起此定亦不能受此定報復有說者生彼處但不名身證不名俱解脫評曰應作是說不生

問曰住彼定爲經幾時答曰欲界中以搏食持諸根四大欲界雖入定時不令身有患出定時則有患是故欲界少時入定不得久住過於七日何以知之曾聞有一僧伽藍有一比丘得滅定食時著衣詣食堂中其日彼打捷椎晚彼比丘精勤而作是念我何故

空過此時不觀未來何時當打捷椎卽立誓願入於滅定乃至打捷椎當起時彼僧伽藍有事難起時諸比丘皆捨僧伽藍去經於三月難事乃解時諸比丘還集會而打捷椎時彼比丘起定卽死後有一乞食比丘獲得滅定以日初分著衣持鉢欲詣村乞食時天大雨彼作是念若入村者壞我衣色若不往者何故空過此時不觀未來卽立願入定乃至雨止當起或有說者雨經半月或有說者雨經一月乃止天雨旣止彼比丘起定卽死以是事故知欲界入滅定無患出時有患是故少時入定不過七日色界不以搏

食持諸根四大入此定者或經半劫一劫或有過者
問曰若不立願入滅定者云何而起答曰如入有心
定法自應起復次若欲食若欲大小便入定雖不作
患出則作患以是事故必應自起

問曰凡夫人爲入滅定不尊者和須蜜說曰凡夫人
不入此定所以者何此是聖人定非凡夫定若凡夫
人入此定者亦是凡夫定復次凡夫人觀上離下地
欲如閣樓蟲非想非非想處更無上地可緣離下地
欲是故凡夫人不入此定復次凡夫人數數入定則
數數身猗心猗以身心猗故方便則緩方便緩故不

能起彼定尊者佛陀提婆說曰凡夫人不入彼定所
以者何凡夫人數數入定我見牢固畏後邊滅法如
畏深坑是故不能入彼定也問曰菩薩爲入滅定不
尊者和須蜜說曰菩薩不入所以者何此定是聖人
定若菩薩入此定者亦應是凡夫定復次菩薩觀上
離下地欲如閣樓蟲非想非非想處更無上地可緣
離下地欲是故菩薩不入此定復次菩薩入滅定所
以者何菩薩欲求一切智時作如是念我應推求一
切處相若菩薩不入滅定者則於此處不名推求尊
者佛陀提婆說曰菩薩不入滅定菩薩雖復摧滅我

見不畏最後滅處如畏深坑不欲令慧有留難及斷
絕故不欲入滅定非不能入問曰菩薩前身時不會
起滅定於最後身而起滅定爲先起滅定後得阿耨
多羅三藐三菩提爲先得阿耨多羅三藐三菩提後
得滅定若先起滅定後得阿耨多羅三藐三菩提者
云何不違期心起不相似心云何名三十四心得一
切智若先得阿耨多羅三藐三菩提後得滅定者云
何名滿足學法得盡智時云何名所作已竟外國法
師作如是說先起滅定後得阿耨多羅三藐三菩提
問曰若然者云何不違期心答曰彼作是說菩薩先

離無所有處欲依第四禪入正決定不起此處乃至
得阿那含果起於滅定得阿耨多羅三藐三菩提問
曰云何不名起不相似心耶答曰彼作是說誰言菩
薩無不相似心菩薩有不相似心問曰云何名三十
四心得一切智答曰彼作是說言三十四心者說無
漏心不說入定出定心罽賓沙門作如是說先得阿
耨多羅三藐三菩提後起滅定
問曰若然者云何名滿足學法答曰言滿足者滿足
於根滿足於果不滿足於定
問曰云何得盡智時名所作已竟答曰或有說解脫

經
阿耨多羅三藐三菩提
十
二七

經
阿耨多羅三藐三菩提
十
二七

障是下無知或有說是於諸定不自在或有說是不
得定者若作是說解脫障是下無知者世尊得盡智
時斷一切無知得一切彼對治智若作是說解脫障
是於諸定不自在者世尊得盡智時於諸禪定解脫
三昧出入皆得自在若作是說解脫障是不得定者
世尊得盡智時得一切定是故得盡智時所作已竟
問曰云何名三十四無漏心答曰菩薩先滅無所有
處欲依第四禪入正決定見道中有十五心道比智
第十六心道比智卽是離非想非非想處欲方便道
無礙道有九解脫道有九是名三十四心

阿毗曇毗婆沙論卷第六十七

金壇善女人于門潘氏法名廣珍施資刻此
阿毘曇毗婆沙論卷第六十七計字七千四百
五十三個該銀三兩三錢五分二厘
崇禎壬申歲孟秋月金沙顯龍山識

阿毗曇毗婆沙論卷第六十八

迦旃延子造

北涼沙門浮陀跋摩共道泰譯

使健度十門品第四之十五

如經說毗舍佉優婆夷詣曇摩提那比丘尼所作如是問阿夷云何入滅定彼作是說毗舍佉優婆夷比丘入滅定不作是念我今入滅定當入滅定已於先時調柔其心欲入此定問曰行者入房洗足敷牀結跏趺坐時無如是念我今入滅定當入滅定耶答曰雖有是事皆是遠時如欲界善心次第起初禪乃至

入滅定無如是念我今入滅定當入滅定復作是問
阿夷云何起滅定彼作是說毗舍佉優婆夷比丘起
滅定時不作是念我今起滅定我當起滅定然緣此
身六入命根故而起彼定若爲饑渴所逼若欲大小
便雖在定時不作患出則作患以是事欲從彼定起
復問比丘入滅定時爲先滅何行身行耶口行耶意
行耶彼作是說毗舍佉優婆夷比丘入滅定時先滅
口行次滅身行次滅意行問曰說滅意行此事可爾
說滅口行身行云何可爾所以者何從初禪起入第
二禪時滅於口行從第三禪起入第四禪時滅於身

行何故說言入滅定時滅身口行答曰入滅定時有
二種有近有遠遠時則滅身口行近時則滅意行復
次若入初禪乃至入非想非非想處盡名入滅定時
所以者何爲入滅定故起此諸地現在前復作是問
阿夷比丘起滅定時先起何行現在前身行耶口行
耶意行耶彼作是說毗舍佉優婆夷比丘起滅定時
先起意行次起身行次起口行問曰若作是說從滅
定先起意行此事可爾若作是說起滅定時起身行
口行云何可爾所以者何從第四禪起入第三禪身
行乃至從第二禪起入初禪口行乃至生何故說起

滅定時起身口行答曰起滅定有近有遠近者起意
行遠者起身口行復次起於滅定乃至初禪盡名起
滅定時所以者何以滅定故從彼諸地起復作是問
阿夷比丘起滅定時心何所隨順心何所轉近心何
所垂入彼作是說毗舍佉優婆夷比丘從滅定起心
隨順離心轉近離心垂入離問曰此中何者是離答
曰或有說者是滅定若作是說是滅定者出定世俗
心有二事隨順離轉近離垂入離一以期心二以緣
出定無漏心與苦智集智相應者有一事隨順離以
緣不以期心與滅智道智相應者亦不以緣亦不以

期心復有說者離是滅盡涅槃若作是說離是滅盡
涅槃者出定世俗心亦無期心亦無緣亦無隨順離
轉近離垂入離若無漏與苦智集智道智相應者於
離有期心無緣與滅智相應者於離有期心亦緣復
有說者離是滅定亦是滅盡涅槃若作是說離是滅
定亦是滅盡涅槃者出定世俗心無漏心與苦智滅
智相應者總而言之有二事隨順離轉近離垂入離
一以期心二以緣與道相應者有一事隨順離轉近
離垂入離有期心無緣復問阿夷比丘從滅定起爲
觸幾觸彼作是說毗舍佉優婆夷觸三觸一不動觸

二無所有觸三無相觸問曰何者是不動觸無所有觸無相觸耶尊者和須蜜說曰空處識處是不動觸無所有處是無所有觸非想非非想處是無相觸復次空是不動觸無願是無所有觸無相是無相觸復次無所有處是不動觸是無所有觸是無相觸無漏者是不動觸無所有處攝故是無所有觸緣涅槃故是無相觸尊者佛陀提婆說曰比丘從滅定起若是非想非非想處心不起餘不相似心當言觸無相觸若是無所有處不相似心當言觸無所有觸若是識處不相似心當言觸不動觸餘五有想定說亦如是

問曰如次第入滅定出滅定時亦次第出不耶答曰如次第入不如次第出如次第出不如次第入如次第睡不如次第覺如次第覺不如次第睡彼亦如是如說若得此定依此定立此定更不受未來生老病死受苦起集問曰此定不能斷結何故作是說若得此定乃至廣說答曰應觀是事爲以何故若學人入滅定者起定作如是念此是須臾滅須臾心心數法不行靜妙乃爾何況畢竟滅畢竟心心數法不行者以是事故卽斷煩惱入無餘涅槃若無學人入滅定者起定作如是念乃至以是事故捨諸陰入無餘涅槃

繫以是事故作如是說若得此定乃至廣說更不受
苦起集

施設經說有作願入定不作願出定有不作願入定
作願出定有作願入定作願出定有不作願入定不
作願出定作願入定不作願出定者猶如有一作如
是念使我入滅定不作是念使我出滅定起四種有
想定若一現在前從彼定出四種有想定若一現在
前是名作願入定不作願出定不作願入定作願出
定者猶如有一不作是念使我入滅定而作是念使
我出滅定起四種有想定若一現在前彼入滅定出

滅定起四種有想定若一現在前是名不作願入定
作願出定作願入定作願出定者猶如有一作如是
念使我入滅定使我出滅定起四種有想定若一現
在前彼入滅定出滅定起四種有想定若一現在前
是名作願入定作願出定有不作願入定不作願出
定者猶如有一不作是念使我入滅定出滅定起四
種有想定若一現在前彼入滅定出滅定起四種有
想定若一現在前是名不作願入定不作願出定問
曰作願入定作願出定可爾何者是不欲入定出定
而入定出定答曰此盡欲入定盡欲出定然入定出

定有自在者有不自在者是故施設經作如是說或有入定心得自在出定心得自在或有出定心得自在入定心得自在或有入定心得自在或有入定出定心得自在或得自在者不作願入定作願出定出定心得自在入定心得自在者不作願出定作願入定入定心得自在出定心得自在者不作願入定不作願出定入定心得自在出定心得自在者不作願入定不作願出定入定者盡欲出定問曰此中說何者四有想定答曰是四無

色問曰何故說四無色是四有想定答曰四無色定於滅定得作逆次定逆超定若出彼定起非想非非想處心次起無所有處心是逆次定若起識處心是逆超定若出彼定起無所有處心次起識處心是逆次定若起空處心是逆超定以是事故說四無色是四有想定經說入滅定者火不能燒水不能漂刃不能傷毒不能害不爲他所殺問曰何故入滅定者火不能燒水不能漂刃不能傷毒不能害不爲他所殺耶尊者和須蜜說曰此定是不害法若入此定害不能害復次此定有大威勢故威德諸天常守護之復

次禪禪境界神足神足境界是不可思議復次此定無心無心者不死不生散者婆經是此論因緣曾聞過去有迦拘孫陀佛有二大賢弟子一名毗頭羅二名散耆婆爾時尊者散耆婆於一城中多所教化於彼城邊多人行處入於滅定時牧牛羊者擔薪草者行道者見皆作是念此大德平坐而死我等應取牛糞乾薪燒之而去如其念卽取乾薪牛糞燒已捨去爾時尊者散耆婆晨朝從滅定起速抖擻僧伽黎以日初分著衣持鉢入城乞食時諸牧牛羊擔薪草行道人見者皆作是言此尊者昨日平坐而死我等以

乾薪牛糞燒已捨來今復還活時人皆號之爲還活所以不燒身者以定力護故所以不燒衣者以神足力持故復有說者所以不燒身不燒衣者皆以定力故是故散耆婆經是此論因緣

如因緣中說施起滅定人得現世報問曰何故施起滅定人得現世報耶答曰此不必須通所以者何此說非修多羅毗尼阿毗曇此是因緣或然不然若必欲通者有何意耶答曰不得現世報而受多報問曰何故施起滅定者若得現報若得多報答曰若施起滅定者食便爲施起諸禪解脫三昧者食所以者何

若欲入此定者先起欲界善心次第入初禪乃至非
想非非想處次第入滅定欲起此定從此定次第起
非想非非想處心乃至初禪次第起欲界善心以行
者身中修如是等功德故施食得現世報若得多報
復次從此定起出入言說著衣受取飲食如是等威
儀寂靜故信心婆羅門居士生敬重心以衣食等施
得現世報若得多報復次此定生人希有想若人聞
彼此丘得於滅定極生希有想信心婆羅門居士以
清淨心施其衣食等得現世報若得多報復次若施
起滅定者食便各施不食人食入有想定者雖不食

搏食而食有漏觸食意思食識食入無漏定雖不食
四種有漏食而以無漏觸意思識持身入滅定者無
四種食亦不以無漏觸意思識持身是故施起滅定
者則施不食人食得現世報若得多報復次若施起
滅定者食便是施到涅槃還者食所以者何此定與
涅槃相似故如入無餘涅槃時一切心心數法不生
不滅滅一切有緣法此定亦爾是故施其食者得現
世報若得多報不但施起滅定人食得現世報施五
種人食亦得現世報一從滅定起二從慈心起三從
無諍起四從見道起五從得盡智起又施五種人食

得多報一施父二施母三施病人四施說法人五施
近佛菩薩問曰此定爲是受生處造業爲是滿業耶
答曰此是滿業非是造業所以者何造業必是業性
彼非業性問曰此定爲得現報爲得生報爲得後報
耶答曰此定得生報不得現報所以者何非想非
想處不能起此定問曰何處受此定報答曰於非想
非非想處報四陰若成就滅定亦成就滅定報耶答
曰或成就滅定不成就滅定報乃至廣作四句成
滅定不成就滅定報者生欲色界得滅定若得滅定
不退生非非想處未受滅定報成就滅定報不成就

滅定者於此得滅定退生非想非非想處受滅定報
成就滅定亦成就滅定報者於此得滅定不退生非
想非非想處受滅定報不成就滅定亦不成就滅定
報者生欲色界中不得滅定生空處識處無所有處
若得滅定退若不得滅定生非想非非想處不受滅
定報

若退滅定亦退阿羅漢果耶答曰或退滅定不退阿
羅漢果乃至廣作四句退滅定不退阿羅漢果者學
人退滅定阿羅漢得滅定退不得自在非起結現在
前退阿羅漢果不退滅定者慧解脫阿羅漢退學時

得滅定無學時起非想非非想處結退滅定亦退阿
羅漢果者學時得滅定無學時起下地結退無學時
得滅定三界結若起一界結退不退滅定亦不退阿
羅漢果者除上爾所事

阿羅漢果者六種謂退法憶法護法等住能進不動
諸退法阿羅漢盡是俱解脫耶若是俱解脫阿羅漢
盡是退法耶乃至不動阿羅漢盡是俱解脫耶若是
俱解脫阿羅漢盡是不動耶答曰或是退法阿羅漢
非是俱解脫乃至廣作四句是退法阿羅漢非俱解
脫者諸退法阿羅漢不得滅定是俱解脫阿羅漢非

是退法者憶法乃至不動得滅定是退法阿羅漢亦
是俱解脫者退法阿羅漢得滅定非退法阿羅漢亦
非俱解脫者憶法乃至不動不得滅定如退法阿羅
漢作四句餘五種阿羅漢作五四句亦如是

如無學道有六種阿羅漢學地亦有六種性學諸退
法學盡是身證耶若是身證盡是退法學耶乃至不
動性學是身證耶若是身證盡是不動性學耶答曰
或是退法性學非是身證乃至廣作四句是退法性
學非身證者退法性學不得滅定是身證非退法性
學者憶法乃至不動性學得滅定是退法性學亦是

身證者退法學得滅定非退法性學亦非得身證者
憶法乃至不動性學不得滅定如退法性學作四句
餘五性學作五四句亦如是

若法與心作次第亦是無間耶答曰或法與心作次
第非是心無間乃至廣作四句與心作次第非心無
間者除定初剎那及有心時餘定剎那及出定心是
也是心無間非心次第者定初剎那及有心時生住
無常是也是心次第亦心無間者定初剎那及有心
時是也非心次第非心無間者除定初剎那及有心
時生住無常餘定剎那及出定心生住無常是也若

法是心次第亦是定無間耶答曰或法是心次第非
定無間乃至廣作四句是心次第非定無間者定初
剎那及有心時是也是定無間非心次第者除定初
剎那及有心時生住無常餘定剎那及出定心生住
無常是也是心次第亦定無間者除定初剎那及有
心時定餘剎那及出定心是也非心次第非定無間
者定初剎那及餘有心生住無常是也八勝處乃至
廣說問曰勝處體性是何答曰是不貪善根對治於
貪若取相應迴轉欲界是四陰色界是五陰
已說體性所以今當說何故名勝處勝處是何義答

曰勝於境界勝於煩惱故名勝處雖諸行者不能盡勝境界然於境界不生煩惱故名勝處如世尊說勝此處故名勝處

界者是色界地者初四勝處未至中間初禪第二禪地後四勝處在第四禪地所依身者是欲界身緣者緣於欲界爲何所緣答曰緣色入盡緣一切欲界色入耶答曰盡緣問曰若然者經云何通如說尊者阿泥盧頭在舍衛國住一精舍有四快意天女來詣尊者阿泥盧頭所作如是言尊者阿泥盧頭我等是快意天女於四處得自在意欲作何等色隨意能作以

自娛樂若欲須衣服瓔珞隨意能作而自娛樂爾時尊者阿泥盧頭作如是念我今應觀此女作不淨想卽起初禪不淨想不能勝之乃至起第四禪不淨觀亦不能勝復作是念此色雜故不能勝之若純一色我則能勝作是念已而語之言姊妹汝等於四處中得自在者盡作青色來卽皆青色亦不能勝復作是念若轉此色或能勝之復語之言作黃色來卽皆黃色赤色亦爾不能勝之爾時阿泥盧頭復作是念白色隨順不淨想若作白色我或能勝復語之言作白色來卽皆白色亦不能勝爾時尊者阿泥盧頭知此

色雜妙不可勝故閉目而坐是時天女作如是念今此尊者不能憶念我等知此事已忽然不現尊者阿泥盧頭不勝境界境界不勝尊者阿泥盧頭譬如二力士相撲不能相勝彼亦如是此說云何通答曰尊者阿泥盧頭雖不能勝餘利根者如佛舍利弗目犍連等則勝問曰能於佛身作不淨觀不答曰能作唯佛能非餘聲聞辟支佛能所以者何佛身清淨無垢一切不淨觀者不能於佛身作不淨想唯佛世尊能於自身作不淨觀復次不淨觀有二種一觀色過患二觀緣起觀色過患不淨觀不能於佛身作觀色過

患不淨觀能作緣起觀餘廣說如雜捷度不淨觀處念處者盡與身念處俱智者盡與等智俱三昧者不與三昧俱根者總而言之與二根相應謂喜根捨根過去未來現在者是三世緣三世者過去緣過去未來必生者緣未來不生者緣三世現在者緣現在善不善無記者是善緣善不善無記者盡緣三種三界繫者及不繫者是色界繫緣三界繫及不繫者是緣欲界繫是學無學非學非無學者是非學非無學緣學無學非學非無學者緣非學非無學是見道斷修道斷無斷者是修道斷緣見道斷修道斷無斷者緣



修道斷名緣義緣者是緣義緣自身他身非身者初二緣自身他身餘緣他身是離欲得方便得者是離欲得亦是方便得初禪者離欲界欲得二禪者離初禪欲得第四禪者離第三禪欲得以方便起現在前是方便得佛不以方便起現在前辟支佛以下方便聲聞或以中或以上方便是會得未曾得者聖人最後身凡夫起會得未曾得者餘凡夫起會得者

八勝處內有色想觀外色內有色想者觀自身色循色想不離色想觀外色者觀少外色若好若惡少有二種一境界少二自在少好色者不弊壞青黃赤白

色惡色者弊壞青黃赤白色於此色生勝知勝見者斷於欲愛過於欲愛緣取前色皆得自在是名爲勝猶如大家大家子驅使奴僕皆得自在在彼亦如是是名初勝處初者次第數在初故名初復次次第入彼定時初入故名初勝處者若入此定善色受想行識是名勝處如初勝處第二勝處亦爾異者先觀少今觀多多有二種一境界多二自在多餘如上說內無色想觀外色內無色想者內不循色想離色想觀外色少餘廣說如上故名第三勝處如第三勝處第四勝處亦爾異者第三觀少好惡色第四觀多內無色

想觀外色如上所說觀青色者作如是觀解諸所有色若略若廣盡觀是青如眼識所觀眼識所行次生意識觀青色青光青影如是內無色想觀外青色青光青影生勝知勝見者斷於欲愛過於欲愛是名勝於色緣取前色皆得自在猶如大家大家子驅使奴僕皆得自在彼亦如有如是想者起如是想現在前是名第五勝處第五義廣說如上如青色黃色赤色白色說亦如是一一異者黃勝處應說迦那迦華喻赤色者應說槃頭耆婆迦華喻白色者應說優師迦星喻問曰此四種色何者最妙尊者和須蜜說曰

白色最妙世人亦說是吉色猶如四方之中東方最勝世人亦稱爲吉彼亦如是尊者佛陀提婆說曰觀白色者心則清淨不隨順睡眠法

十一切處乃至廣說問曰十一切處體性是何答曰八是無貪善根對治於貪若取相應迴轉是四陰五陰性若是欲界四陰若是色界五陰空處識處一切處體性是四陰此是一切處體性乃至廣說

已說體性所以今當說何故名一切處一切處是何義答曰以二事故名一切處一以不缺二以廣大不缺者無有處所緣地復緣於水如緣地若緣水緣火

風青黃赤白空處識處不缺亦如是廣大者普徧緣地乃至普徧緣識尊者佛陀提婆說曰徧緣一切無有空缺名一切處

界者八在色界二在無色界地者八在第四禪地空處一切處在空處地識處一切處在識處地所以者何淨解脫在第四禪地能入後四勝處後四勝處能入八一切處淨解脫緣淨境界不能分別若好若惡青黃赤白勝處能分別不能令無邊一切處能令青黃赤白無邊此色爲何所依知依四大是故次觀無邊地無邊水無邊火無邊風此廣大誰所生以覺故

知色等依空是故次觀無邊空處彼覺何所依依於識是故次觀無邊識識更無所依故更不立一切處所依身者八依欲界身後二依三界身行者不行行緣者八緣欲界緣欲界何法答曰緣於色入二緣無色界念處者八與身念處俱後二與法念處俱智者盡與等智俱三昧者不與三昧俱根者與一捨根相應過去未來現在者是三世緣三世者八過去者緣過去未來必生者緣未來必不生者緣三世現在者緣現在後二者緣三世善不善無記者是善緣善不善無記者八緣三種二緣善無記是三界繫不繫者

八是色界繫二是無色界繫緣三界繫不繫者八緣
欲界繫二緣無色界繫是學無學非學非無學者是
非學非無學緣學無學非學非無學者緣非學非無
學是見道斷修道斷不斷者是修道斷緣見道斷修
道斷不斷者八緣修道斷二緣見道修道斷緣名緣
義者是緣義緣自身他身非身法者八緣他身二緣
自身他身是離欲得方便得者是離欲得是方便得
離欲得者離欲時得方便得者作方便得佛不以方
便起現在前辟支佛以下方便聲聞或以中或以上
是本得未曾得者是本得亦是未曾得聖人內道凡
夫亦是本得亦是未曾得餘凡夫是本得

問曰一切處方便云何答曰四以眼識爲方便滿足
時緣青黃赤白色入四以身識爲方便滿足時緣地
水火風觸入復有說者七以眼識爲方便除風一切
處復有說者八以眼識爲方便問曰風一切處云何
以眼識爲方便答曰眼識亦取風色入如是相謂有
塵無塵滿一切處毗嵐風等空處一切處以空爲方
便識處一切處以識爲方便

十一切處云何爲十觀上下諸邊地無有缺無有量
上者是上方下者是下方諸邊者是四方四維無缺

者不雜無量者無有邊際是名初一切處初者次第數在初故名初復次順次入此定時初入故名初一切處者入此定時善色受想行識此是一切處乃至識處一切處說亦如是異者空處一切處識處一切處不說色陰問曰入一切處緣上下諸邊可爾所以者何彼所緣有方所故空處一切處識處一切處所緣無方所云何有上下諸邊答曰入一切處應說有上下諸邊二一切處無上下諸邊若如是說者有何意耶答曰行此定者在上下諸邊故如人中修空處一切處是下四天王天中修識處一切處是上餘方

說亦如是

問曰何故第三禪無解脫無勝處無一切處耶答曰非其田器乃至廣說復次對治欲界色愛故初禪立解脫對治初禪色愛故第二禪立解脫第二禪無色愛故第三禪不立解脫以第二禪無解脫故亦無勝處亦無一切處所以者何以解脫入勝處以勝處入一切處故復次以遠故不妙故第三禪於欲界遠於四禪不妙復次以如第三無色定故空處識處有無邊行非想非非想處有滅定無所有處無無邊行亦無滅定如第三無色定善根減少第三禪亦如是復

次第三禪有一切生死最勝受樂行者多於中著樂
故不能起解脫勝處一切處問曰若然者何故有無
量神通等功德答曰一切起不必有一切功德若當
彼地無無量無神通者彼地便是空無功德地
佛經說入地一切定者作如是念地卽是我我卽是
地我定與地無二無別餘一切處亦如是問曰若得
一切處必離第三禪欲若計地是我必是第四禪地
身見計第四禪地是我一切處緣欲界此云何可爾
答曰此中說不定名定如非沙門說名沙門非婆羅
門說名婆羅門彼亦如是復次此說前所得事譬如

國王雖復亡國富貴之事猶名爲王此亦如是先得
此定而退失之以曾得故作如是說復次彼是速入
定者於彼定退起欲界身見計欲界地是我速還離
欲起一切處復緣欲界如提婆達多能速入定以神
足力自化作小兒五華鬚髮著金瓔珞於太子阿闍
世抱上宛轉遊戲復現此相使太子阿闍世知是大
聖提婆達多時太子阿闍世抱弄鳴之以唾著其口
中以貪利養故而咽其唾是故世尊語提婆達多汝
如死屍食唾之人彼食唾時退失神足速入定故尋
得離欲自化其身還在太子阿闍世抱上宛轉遊戲

復次身見計第四禪地是我一切處亦觀第四禪地
問曰一切處緣於欲界答曰亦有緣第四禪者若作
是說者一切處亦緣第四禪問曰若然者色界諸天
純是白色云何觀青黃赤色耶答曰彼作是說色界
諸天身純一白色諸非衆生數物有青黃赤色不應
作是說若身見與一切處相應者有如是過云何相
應共有法或緣欲界或緣第四禪身見不與一切處
相應然一人亦名計我亦名得定以起身見故名爲
計我以起一切處故名爲得定身見計第四禪地是
我一切處緣欲界非一時故此經善通

有地定有地一切處定乃至有白定有白一切處定
問曰地定地一切處定有何差別答曰地定在欲界
四禪地一切處定在第四禪復次方便是定滿足是
一切處復次因是定果是一切處復次少分是定偏
是一切處地定地一切處定是謂差別

問曰解脫勝處一切處有何差別答曰名卽差別是
名解脫是名勝處是名一切處復次下善根是解脫
中善根是勝處上善根是一切處復次少善根是解
脫勝多中善根是勝處無量上善根是一切處復次
因是解脫果是一切處因果是勝處復次背捨義是

解脫能勝緣義是勝處徧緣義是一切處復次心解脫是解脫勝煩惱義是勝處無缺徧義是一切處復次若得解脫不必得勝處一切處若得解脫勝處不必得一切處若得一切處必得解脫勝處所以者何解脫能入勝處勝處能入一切處解脫勝處一切處是謂差別

阿毗曇毗婆沙論卷第六十八

音釋

抖擻

抖當口切擻蘇后切抖擻振舉貌

撲

蒲木切擊也

唾

湯卧切口液也

金壇善女人于門潘氏法各廣珍施資刻此
阿毘曇毘婆沙論卷第六十八計字七千八百
十三個該銀三兩五錢一分五厘
崇禎壬申歲孟秋月金沙顯龍山識

經

阿毗曇毗婆沙論卷第六十九

五

二八

阿毗曇毗婆沙論卷第六十九

迦旃延子造

北涼沙門浮陀跋摩共道泰譯

使健度十門品第四之十六

八智法智比智他心智等智苦智集智滅智道智云
何法智乃至道智廣說如經本問曰彼尊者何故於
此論中以八智而作論答曰彼尊者有如是欲如是
可如是意欲以八智而作論隨其欲意亦不違法相
立八智而作論餘處亦立八智而作論如定智健度
中說或欲以二智而作論即立二智如智健度中說

經

阿毗曇毗婆沙論卷第六十九

一

二九

他心智念前世智智健度中亦立法智比智定健度中立盡智無生智或欲以四智而作論卽立四智如根健度中說若苦智是苦無漏智耶乃至若道智是道無漏智耶或欲以十智而作論卽立十智隨其所知譬如陶師以知泥團安置輪上隨其所欲出種種物不損所能彼尊者亦如是以聞思修慧除所知過隨其所欲而作論不違法相亦如是復次不應求彼尊者何故立八智耶所以者何此是佛經佛經說八智法智乃至道智彼尊者以佛經是此論根本因緣故依八智而作論彼尊者無力於八智中減一智說

七智增一智說九智所以者何佛經無有增減無增者無增可減無減者無減可增如無增無減無益無損無量無邊無量者是無量義無邊者是無邊文猶如大海水無量無邊無量者深無量無邊者廣無邊一切佛經亦無量無邊無量者義無量無邊者文無邊如尊者舍利弗等百千論師欲解佛經二句義故造百千那他論盡其覺性退還而不能知佛經二句義邊際到於彼岸問曰若佛經是此論根本因緣者佛經中多種說智或說二智如二法中或說四智如四法中或說八智如八法中或說十智如十法中何

故後尊者於多種智中此使捷度依八智而作論答
曰八智是中說攝一切智二智雖攝一切智而是略
說十智雖攝一切智而是廣說復次若智數數修數
數現在前者依此智而作論復次此八智亦是智性
亦是見性盡智無生智雖是智性而非見性復次若
智是有欲無欲人身中可得者依此智而作論盡智
無生智是無欲人身中可得復次若智是學無學人
身中可得者依此智而作論盡智無生智是無學人
身中可得如學無學所作已所作未棄重擔已棄重
擔未逮已利已逮已利有求無求當知亦爾彼尊者

或依剎那項一智而作論如雜捷度說頗有一智知
一切法耶答曰不知若依十智而作論者此論不成
若依九八七六五四三二智而作論者此論不成乃
至一智二剎那項而作論者此論亦不成所以者何
初智剎那項不知自體相應共有法第二剎那項知
前智相應共有法彼中依剎那項一智而作論故答
曰不知或說一智攝一切智謂法智非如法智以體
是法故或說二智攝一切智如有漏智無漏智縛智
解智繫智不繫智或說三智攝一切智如法智比智
等智或說四智攝一切智前三智更增他心智或說

五智攝一切智如等智苦集滅道智或說六智攝一切智前五智更增他心智或說七智攝一切智除他心智或說八智攝一切智增他心智問曰若八智攝一切智者復有八智謂法住智涅槃智生死智漏盡智念前世智願智盡智無生智云何攝耶答曰雖更有八智亦是八智所攝所以者何此八智盡在前八智中故問曰此八智云何在在前八智中答曰住名諸法因三界上中下果在因中住若知此智名爲因智因智是四智性等智法智比智集智涅槃智是滅智亦是四智性等智法智比智滅智生死智者舊阿毗

曇者罽賓沙門作如是說是一智謂等智尊者婆摩勒已作如是說生死智是四智性謂法智比智等智苦智評曰應作是說是一等智漏盡智或有說者是漏盡人身上可得故名漏盡智若作是說是十智性或有說者漏盡智是緣漏盡處智若作是說漏盡智是四智性謂法智比智等智滅智念前世智舊阿毗曇者罽賓沙門作如是說是一等智尊者瞿沙作如是說是六智除滅智他心智非他心智所以者何他心智緣現在法非滅智所以者何滅智緣無爲法評曰應作是說是一等智願智是一等智或有說是八

智性者除盡智無生智所以者何願智是見性彼二智非見性評曰應作是說願智是一等智盡智無生智是六智謂法智比智苦集滅道智以如是等事故八智攝一切智尊者僧伽婆修說曰應說一智謂決定智所以者何決定義是智義彼決定有有漏有無漏有縛有解有繫有不繫有漏者是等智是縛是繫無漏智是解是不繫或是欲界對治或是色無色界對治或是欲界對治者是法智若是色無色界對治者是比智此三智若知他心心數法是知他心智無漏決定智或行苦四行乃至行道四行若行苦四行

者是苦智乃至若行道四行者是道智問曰若然者唯有三智法智比智等智答曰如是唯有三智謂法智比智等智問曰若然者云何立八智答曰以五事故一以對治二以方便三以自體四以行五以緣行對治者是法智比智方便者是他心智自體者是等智行者是苦智集智所以者何此智行不同緣同緣以此五事故立八智尊者婆摩勒說曰對治四種愚故立八智四種愚者界愚心愚法愚諦愚對治界愚故說法智比智對治心愚故說他心智對治法愚故

說等智對治諦愚故說苦集滅道智此是智體性乃至廣說已說體性所以今當說何故名智智是何義答曰決定義是智義問曰若決定義是智義者疑相應智則非智所以者何不決定故答曰疑相應慧亦是智但疑於聚中有勢用故言是疑聚如多愛人名爲愛行非無慧癡以愛有勢用故名爲愛行彼亦如是慧行癡行說亦如是譬喻者作如是說若心有智則無不智若心決定則無猶豫若心有麤則無有細亦爲阿毗曇者說過汝說法相猶如若干草木雜生一處而無別相一心中有智無智非智非不智猶豫

決定非猶豫非決定麤細非麤非細阿毗曇者復作是說我法生時衆生一心中有智無智非智非無智決定猶豫非決定非猶豫麤細非麤非細智者是智非智者是無明非智非無智者是餘心心數法猶豫者是疑決定者是慧非決定非猶豫者是餘心心數法麤是覺細是觀非麤非細是餘法復有說者以二事故名智一以決定二以適可知苦乃至知道名決定自適適他意故名適可

已總說諸智所以今當一一分別說所以者何何故名法智答曰體是法故名法智問曰餘智體亦是法

何故不名法智耶答曰餘智雖體是法而法智是法如十八界雖體是法十二入體亦是法七覺支體亦是法四念處體亦是法四不壞淨體亦是法四無礙體亦是法三歸三寶體亦是法而法界法入擇法覺支念法法念處法不壞淨法無礙法歸法寶法而名爲法如是十智體雖是法而法智名法復次法智有一名餘智有二名法智是共名餘智是共不共名以不共名說復次以初知法故名法智後知法故名比智復次彼智相應初得信法名法智後得信法名比智復次於法中現見故名法智次現後生故名比智

復次欲界多諸非法煩惱如忿恨諍誑放逸害等非法誰是彼近對治謂法智是也色無色界無如是非法煩惱故名比智復次若智是六地所攝緣於一地是法智若智九地所攝緣於八地是比智復次若智六地所攝緣六地者是法智若智九地所攝緣九地者是比智復次若智對治十八界十二入五陰者是法智若智對治十四界十入五陰者是比智復次若智對治善不善無記五陰者是法智若智對治善無記五陰者是比智若智對治福非福不動行者是法智若智對治福不動行者是比智復次若智對治搏

食愛婬欲愛是法智若智對治定愛是比智何故名
知他心智答曰知他心故名知他心智問曰亦知他
心數法何故但名知他心智耶答曰以期心故行者
期心作如是念使我知他心若知他心亦知數法猶
如有人作如是念使我見王若見王時亦見王侍者
彼亦如是復次此法以種種事故得名或以自體或
以對治或以方便或以相應或以所依或以行或以
緣或以行緣以自體者如陰如諦如等智以對治者
如法智比智若對治欲界名法智若對治色無色界
名比智以方便者如空處識處五現三昧他心智以

相應者如波伽羅經說云何樂受法答曰若法與樂
受相應云何苦受法答曰若法與苦受相應云何不
苦不樂受法答曰若法與不苦不樂受相應以所依
者眼識乃至意識若依眼生名眼識乃至依意生名
意識以行者是苦智集智所以者何此智行不同緣
同或以緣者念處無相三昧以行緣者是滅道智所
以者何彼行不同緣亦不同復次以名義勝故此聚
中誰爲最勝心爲最勝譬如王來眷屬亦來但言王
來彼亦如是餘廣說如雜犍度說心處何故名等智
答曰世人等行此智故名等智如男女來去世人現

所行法等問曰亦緣第一義法何故名世智答曰從
多分故多緣世法少緣第一義法復次此智無第一
義相以多人所稱故名智猶如多人所立之王雖非
王種以多人所立故亦名爲王彼亦如是復次此智
是假名所以者何一切人一切衆生一切處盡有此
智故復次此智是愚所依處愚立足處復次此智是
所差故猶如人差上座差維那聲論者說曰此智爲
無智所覆故名等智猶器中物名爲覆物何故名苦
智乃至道智答曰以對治決定故所緣決定故乃至
道智亦如是復次處所決定故對治決定故名苦智

乃至道智復次行苦四行故名苦智乃至行道四行
故名道智問曰若有漏慧行苦四行乃至行道四行
是苦智乃至道智耶答曰若行苦四行行道四行於
諦有決定者名苦智道智善有漏慧雖行苦四行乃
至行道四行於諦不決定故不名苦智乃至道智復
次若行苦四行乃至行道四行煩惱更生復次若行
苦集滅道四行見不復名不見智不復名不知已得
決定處不爲無知猶豫邪見所覆善有漏慧雖行苦
等四行見還不見知還不知還爲無明猶豫邪見所
覆復次若行苦等四行能滅損破壞於有是苦智乃

至道智善有漏慧雖行苦四行乃至行道四行增益
長養於有餘答如雜鍵度廣說復次若行苦等四行
不行集滅道等四行是苦智若行集等四行不行苦
滅道等四行是集智若行滅等四行不行苦集道等
四行是滅智若行道等四行不行苦集滅等四行是
道智善有漏慧若行苦等四行亦行集滅道等四行
或行苦行亦行集行或行苦行亦行滅行或行苦行
亦行道行或行集行亦行滅行或行集行亦行道行
或行滅行亦行道行或行苦行亦行集行滅行或行
苦行亦行集行道行或行苦行亦行滅行道行或行

集行亦行滅行道行或行苦行亦行集行滅行道行
行如是行時當言是苦智乃至當言是道智復次若
行苦集滅道四行不同苦集一繫善有漏慧雖行苦
集滅道四行同苦集一繫問曰滅道不同一繫何故
不立滅道智耶答曰以始不中立故終亦不中立界
者他心智有漏者是色界繫無漏者是不繫等智是
三界繫餘是不繫地者法智在六地謂未至中間根
本四禪比智在九地上說六地三無色地除非想非
非想地他心智在根本四禪地等智在十一地欲界
未至中間根本四禪四無色地餘若是法智分在六

地若是比智分在九地所依身者法智依欲界身心智依欲色界身比智等智依三界身餘若是法智分依欲界身若是比智分依三界身行者法智比智行十六行他心智若無漏者行道四行有漏者不行行等等智行十六行亦有不行行者苦智行苦等四行集智行集等四行滅智行滅等四行道智行道等四行緣者法智比智緣四諦他心智緣心心數法等智緣一切法苦智緣苦諦集智緣集諦滅智緣滅諦道智緣道諦念處者他心智是三念處除身念處滅智是法念處餘智是四念處智者卽智三昧者法智

比智與三三昧俱他心智若無漏者與道無願三昧俱有漏者不與三昧俱等智不與三昧俱苦智與三三昧俱集智與集無願三昧俱滅智與無相三昧俱道智與道無願三昧俱根者等智與五根相應餘智總而言之與三根相應過去未來現在者是三世緣三世及非世者法智比智等智緣三世亦緣非世法他心智過去者緣過去現在者緣現在未來必不生者緣三世必生者緣未來滅智緣非世法餘智緣三世善不善無記者等智是三種餘智是善緣善不善無記者比智緣善無記滅道智緣善餘智緣三種是

三界繫及不繫者他心智有漏者是色界繫無漏者是不繫等智是三界繫餘智是不繫緣三界繫不繫者法智緣欲界繫及不繫比智緣色無色界繫及不繫他心智緣欲色界繫及不繫等智緣三界繫及不繫苦智集智緣三界繫滅智道智緣不繫是學無學非學非無學者他心智是三種等智是非學非無學餘智是學無學緣學無學非學非無學者法智比智等智他心智緣三種苦集滅智緣非學非無學道智緣學無學是見道斷修道斷不斷者他心智有漏者修道斷無漏者是不斷等智是見道修道斷餘智是

不斷緣見道斷修道斷不斷者法智比智他心智等智緣三種苦智集智緣見道斷修道斷滅智道智緣不斷緣名緣義者法智比智等智苦智集智緣名緣義餘智緣義緣自身他身非身者法智比智等智緣自身他身及非身他心智緣他身苦智集智道智緣自身他身滅智緣非身若苦智行苦行耶若行苦行是苦智耶答曰或是苦智非行苦行乃至廣作四句是苦智非行苦行者苦智行無常行空行無我行行苦行非苦智者行苦行苦智相應法是苦智亦行苦行者苦智行苦行非苦智非行苦行者苦即取此種

性者行無常行空行無我行苦智相應法若不即取此種性者除上爾所事已行苦行當行苦行說亦如是如苦行有三四句無常行空行無我行亦有三四句如苦智有十二四句集智滅智道智各十二四句合四十八四句

有四事故名法智一以初知法二以現見法三是實智四是捨智有四事名比智一以因比相知果二以果比相知因三以身口行比相知心四以所說比相知佛有四事名他心智謂因次第緣威勢如此智有四事智所緣亦有四事謂因次第緣威勢有四事名

等智一以名等二以縛等三以假等四以著等有四事名苦一以熱惱二以生三以身受四以死若智行此四事是名苦智有四事名集一以業二以煩惱三以愛四以無明若智行此四事名集智有四事名滅初沙門果斷三結第二果斷三結薄愛恚癡第三果斷五下分結第四果斷一切結若智行此四行是滅智有四事名道一從第八乃至一切學諸有所作二降伏怨敵三觀本所作四近漏盡若智行此四行是名道智有四事名盡智一不攝見二不行空三除他心智四方便遲緩有四事名無生智一知因二知果

三知自身四以人十智應言一智謂法智非如法智以體是法故十智應言一智謂決定智所以者何決定義是智十智應言一智謂智所知亦是一智謂於所知審實生著十智應言一智謂道智以道諦攝故十智應言一智謂願智以滿所願故十智應言一智謂盡智盡諸煩惱身中可得故十智應言一智謂無生智更不迴還故

三三昧空無願無相應說一三昧如心數法中定如定根定力定覺支正定應說二三三昧謂有漏無漏縛解應說四三昧謂欲界繫色界繫無色界繫不繫應說五三昧謂欲界繫色界繫無色界繫學無學若以在身若以剎那則有無量三昧云何世尊於一三昧於無量三昧立三三昧答曰以三事故一以對治二以期心三以所緣對治者是空三昧空三昧是身見近對治身見行我行我所行空三昧行空無我行爲以何行對治何行答曰以無我行對治我以空行對治我所行復次無我行對治五我見行空行對治十五我所見行復次無我行對治已見空行對治已所見復次無我行對治我見愛空行對治我所見愛復次陰非我是無我行陰中無我是空行復次眼非

我是無我行眼中無我是空行乃至意亦如是復次
性空是無我行無所行空是空行期心者是無願期
心不願於有故名無願問曰亦期心不願於道耶答
曰不應作是問亦不期心不願於道然不願於道自
有所以聖道雖非有而依於有行者期心不願於陰
而聖道依陰不願於世而聖道依世不願於苦而聖
道與苦相續問曰若然者聖人何故修道答曰欲到
涅槃故行者作如是念除於聖道更有方便到涅槃
不知更無有是故欲到涅槃故修道所緣者是無相
緣無十相法故是無相十相者謂色聲香味觸男女

相及三有爲相復次陰是相彼緣陰滅故是無相世
是相前後是相下中上是相彼不緣世不緣前後不
緣下中上故是無相復有說者三三昧亦行行空三
昧行二行謂空無我行無願三昧行十行謂集道八
行無常苦行無相三昧行四行謂滅四行復有說者
三三昧是對治空三昧是身見近對治無願三昧是
戒取近對治無相三昧是疑近對治施設經說空三
昧是空非無願無相無願三昧是無願非空無相無
相三昧是無相非空無願所以者何空三昧所行非
無願無相無願無相亦如是復次說空三昧是無願

無願是空三昧無相卽無相非空非無願問曰何故
二三昧同一體一三昧異體耶答曰以此二三昧一
時得對治一種法一時得者若依空三昧得正決定
見苦四心頃未來無願三昧修若依無願三昧得正
決定見苦四心頃未來空三昧修對治一種法者此
二三昧俱對治見苦所斷法復次說空三昧是空無
願無相云何是空此中無有常不變易空無我無我
所云何是無願此三昧不願於愛不願於恚不願於
癡不願未來有云何是無相答曰此三昧無色聲香
味觸故是無相無願是無願亦是空亦是無相云何

是無願此三昧不願愛恚癡不願未來有云何是空
此三昧空無有常乃至無我無我所云何是無相此
三昧無有色相乃至觸相無相三昧是無相是空是
無願云何是無相此三昧無色相乃至無觸相云何
是空此三昧無有常乃至無我無我所云何是無願
此三昧不願於愛乃至廣說此是三昧體性乃至廣
說

已說體性所以今當說何故名三昧三昧是何義答
曰以三事故名三昧一以正二以攝三以相續正者
無始以來煩惱惡行邪見顛倒令心心數法燒濁所

以令其正直者皆是三昧力攝者無始以來心心數法散亂於色聲香味觸法中所以攝令不散住一緣中皆是三昧力相續者心心數法生無定次第善心次第生染汚無記心染汚心次第生善心無記心無記心次第生善心染汚心所以能捨二種心但令善心相續者皆是三昧力復有三事故名三昧一住一處二繫在一緣三正思惟復有三事故名三昧一自正心二生種善根三令心正直相續復有三事故名三昧一於緣中不從二持種種善法三能令種種善心住一緣中尊者和須蜜說曰何故名三昧答曰能令種種善心住一緣中餘說如上尊者佛陀提婆說曰三昧有多名有善法三昧有不善法三昧有無記法三昧有無次第三昧此中說心正三昧名三昧

阿毗曇毗婆沙論卷第六十九

常燕縣善女人繆門王氏福智刻此
阿毘曇毘婆沙論第六十九卷計字六千五百
五十四個該銀二兩九錢七分五厘爲
薦無錫縣王門吳氏用資後福早證菩提者
崇禎壬申歲季春月顧龍山識

阿毗曇毗婆沙論卷第七十一
經
一
二
三
四
五
六
七
八
九
十
十一
十二
十三
十四
十五
十六
十七
十八
十九
二十

卷七十一
緣中

阿毗曇毗婆沙論卷第七十一

七十一
同卷

迦旃延子造

北涼沙門浮陀跋摩共道泰譯

使捷度十門品第四之十七

界者有漏者三界繫無漏者不繫地者有漏者在十
一地無漏者在九地所依身者依三界身行者空有
二行無願有十行無相有四行緣者空三昧有漏者
緣一切法無漏者緣苦諦無願緣三諦無相緣滅諦
念處者空無願三昧是四念處無相三昧是法念處
智者空三昧與四智俱謂法智比智等智苦智無願

經
阿毗曇毗婆沙論卷第七十一
二十一

三昧與七智俱除滅智無相三昧與四智俱謂法智
比智等智滅智三昧者卽三昧根者總而言之與三
根相應過去未來現在者是三世緣三世法者空三
昧緣三世及非世法無願緣三世無相緣非世善不
善無記者是善緣善不善無記者空無願緣三種無
相緣善是三界繫不繫者或三界繫或不繫緣三界
繫及不繫者空三昧有漏者緣三界繫及不繫無漏
者緣三界繫無願緣三界繫及不繫無相緣不繫是
學無學非學非無學者是三種緣學無學非學非無
學者空三昧有漏者緣三種無漏者緣非學非無學

無願緣三種無相緣非學非無學是見道斷修道斷
不斷者有漏者是修道斷無漏者不斷緣見道斷修
道斷不斷者空三昧有漏者緣三種無漏者緣見道
斷修道斷無願緣三種無相緣不斷緣各緣義者空
無願緣義緣各無相緣義緣自身他身非身者空三
昧有漏者緣三種無漏者及無願緣自身他身無相
緣非身若空三昧盡行空行耶答曰或空三昧不行
空行乃至廣作四句空三昧不行空行者空三昧行
無我行行空行非空三昧者行空行空三昧相應法
空三昧行空行者行空行空三昧非空三昧非行空

行者若即取此種性行無我行空三昧相應法若不
即取此種性除上爾所事已行當行亦如是如空三
昧空行作四句空三昧行無我行亦如是無願作三
十四句無相作十二四句合四十八四句

問曰三昧解脫門有何差別答曰三昧是有漏無漏
解脫門唯無漏問曰何故三昧是有漏無漏解脫門
唯無漏耶答曰解脫門不應是有漏不應是繫縛問
曰爲以得正決定爲以盡漏立解脫門耶若以得正
決定者苦法忍相應定應是解脫門若以盡漏者金
剛喻定應是解脫門答曰應作是說以得正決定亦

以盡漏故名解脫門所以者何得一切聖道盡名決
定一切斷盡名盡漏如世第一法次第得苦法忍苦
次第得集集次第得滅滅次第得道盡漏者或依空
三昧盡三界漏或依無願三昧盡三界漏或依無相
三昧盡三界漏問曰何故名解脫門答曰如楯法故
譬如鬪人執楯在前斷怨敵頭行者爾時持如楯解
脫門在前斷煩惱怨家成就頭墮著不成就地如說
定是正道不定是邪道定心得解脫非不信心有定
者能知陰生滅滅

施設經廣說空謂內空外空內外空有爲空無爲空

無始空性空無所有空第一義空空問曰施設經何故廣說空耶答曰以空是二十身見近對治

佛經說若聖弟子具足三三昧鬘者能斷不善法修行善法問曰何故說三三昧名鬘答曰以其妙好世人生欣上心故如少年時首繫華鬘若男若女生愛敬心行者亦爾若繫三昧鬘諸天人則生愛敬復次如人首繫華鬘風則不亂其髮諸功德首若繫三昧華鬘者掉風不能亂譬如華若繫以爲鬘則所用處多諸功德亦爾若繫以爲鬘則多有所用能得正決定得果離欲盡漏復次世人於所繫華作鬘想賢

聖亦爾以三三昧繫諸功德亦作鬘想亦如世人次第繫華而生鬘想賢聖亦爾次第繫心於一緣中亦作鬘想佛經說空三昧是上座住處問曰何故說空三昧是上座住處答曰以諸上座多住是處故三界中佛是有德上座次辟支佛次尊者舍利弗常住此處故言上座住處復次空是內道中不共法內道一切皆是上座外道一切皆是年少內道中年八歲者皆是上座所以者何成就上座法故外道年八十者皆是年少所以者何成就年少法故問曰諸外道有無願無相耶答曰雖無根本者有相似者麤行似無

願止行似無相空乃至無相似者何況根本復次以能生上座法故空名上座住處上座法者是道道果誰能生者謂空能生復次安住審諦法故空名上座住處衆生若不得空三昧則情性輕躁躁動若得空三昧情性則不動如山是故尊者瞿沙作如是說若知解脫法則情性審諦情性審諦名上座是故說空是上座住處復次行者住空法時適意不適意好不好有益事無利益事資生樂事資生苦事於此事中心不移動曾聞尊者舍利弗其母命終共住弟子還俗長齒比丘常於尊者舍利弗有怨嫌心作如是

念我今應往告其不吉之事爾時長齒比丘便詣尊者舍利弗所作如是語長老當知汝母命過共住弟子還俗尊者舍利弗作如是答我母命過此是有身之法我弟子還俗此是凡夫之法時長齒比丘作是念長老舍利弗雖作是言心必有異爾時尊者舍利弗以是事故明朝著衣持鉢入舍衛城次第乞食飲食訖還詣住處舉衣鉢洗足已以尼師壇著肩上從祇洹林詣安陀林於晝日露處坐一樹下心生是念世間頗有可愛妙色變易散滅之時令我生憂悲苦惱者不徧觀見無有者爾時尊者舍利弗以日暮時

經
從安陀林還祇洹林爾時長老阿難於所住精舍門
邊經行見尊者舍利弗來問言尊者舍利弗從何處
來舍利弗答言我從安陀林來復問尊者舍利弗汝
於安陀林多住何三昧舍利弗答言住覺觀三昧阿
難復問住何覺何觀耶舍利弗言我晝日於安陀林
有如是覺世間頗有可愛妙色乃至廣說阿難問言
尊者舍利弗於意云何爲有如是色不舍利弗答言
無也阿難復語尊者舍利弗言汝常作是說若佛不
出世我等便爲無目而死佛是可愛妙色若當變易
散滅汝不生憂悲苦惱耶尊者舍利弗答言若令世

尊變易散滅我亦不生憂悲苦惱但有是念世尊速
般涅槃世間眼速滅爾時長老阿難歎言善哉善哉
尊者舍利弗善除我見我所見及與我慢斷其根本
如斷多羅樹頭更不復生如來雖是可愛妙色若當
變易散滅者當有何憂悲苦惱耶是故行者住彼法
時於適意不適意好不好有益無利益資生樂事
資生苦事心不移動是故名空是上座住處復說尊
者舍利弗於俱薩羅國住一林中爾時有一阿耆婆
楚志亦住彼林去尊者舍利弗不遠值彼人民設四
月節會時彼楚志詣村落中多飲好酒飽食猪肉復

持餘肉及酒一瓶還所住林見尊者舍利弗坐一樹下生輕賤心彼之與我俱是出家我今極樂而彼比丘極苦卽說偈言

我飲秬糧酒 竊持一瓶來 地上山草木 視之猶金聚

爾時尊者舍利弗作如是念此如死梵志向我說如是偈我今亦應說偈時尊者舍利弗便說此偈

我飲無相酒 復竊持空瓶 地上山草木 視之猶唾聚

此偈中尊者舍利弗以三解脫門作師子吼如說我

飲無相酒是無相解脫門復竊持空瓶者是空解脫門地上山草木視之猶唾聚是無願解脫門

說無相有多名或說空是無相或說見道是無相或說不動心解脫是無相或說非想非非想處是無相或說無相是無相說空是無相者如經說有一比丘得無相心定彼比丘根鈍不知是定有何功德有何果報作是思惟誰知此定功德果報復作此念長老阿難佛所稱譽諸梵行者之所信敬必知此定所有功德果報我今應往問如是事復作是念長老阿難善知物相若我往問當還問我汝得是定耶若答言

得彼比丘是少欲覆藏善法者不欲顯已功德若答
言不得是現前妄語若作餘言不正答者則是惱亂
上座比丘我由來不曾惱亂上座比丘我今但應隨
逐其後若爲他人說是法者我當得聞時彼比丘於
六年中隨阿難後而猶不聞爲他解說爾時比丘問
長老阿難言若人得無相心定心無增減住難得行
猶水停住已住故解脫已解脫故住世尊說是定有
何功德有何果報耶爾時長老阿難問彼比丘汝得
此定耶時彼比丘作如是念如我所畏今果問之卽
便默然爾時阿難作如是說若比丘於無相心定無

增無減乃至廣說佛說此定所有果報得一切知見
能生智慧修道盡漏汝亦不久當得此法不增者是
斷我見不減者斷我所見五我見十五我所見亦如
是不增者是生死不減者是涅槃住難得行者此行
難得多用功多有所作如水停住者譬如水從其源
出停住一處更不餘流如是彼定住於一緣更不餘
緣住故解脫者是自體解脫解脫故住者是身中解
脫是中說空是無相餘處亦說無相是空如法印經
說若斷色相觀色乃至廣說衆生相是境界相若彼
比丘見於空法則除衆生相於境界不見有男相女

相是故尊者瞿沙作如是說衆生相是境界相若有是空行於境界不見有男相女相說見道是無相者如說目捷連提舍梵志不說第六人行無相耶云何第六人行無相答曰第六人行無相者是堅信堅法所以者何彼是無相不可數不可易知在此在彼若苦法忍若苦法智乃至道比忍比智問曰何故見道名無相答曰此道是速疾道不起期心道故不動心解脫是無相者如說長老伽婆達多貪欲是相恚癡是相不動心解脫是最勝無相問曰何故不動心解脫名無相耶答曰煩惱是相彼心不爲煩惱所覆不

爲所壞不以上著下非不得自在是故說不動心解脫名無相非想非非想處名無相者如說我多用功得無相心定問曰何故說非想非非想名無相定答曰以非想非非想處愚騃不猛利不決定猶如疑亦無了了有想相亦無了了無想相說無相名無相者如此中說經說佛在舍衛國住東方精舍彌伽羅母堂爾時長老阿難往詣佛所頭面禮足而白佛言世尊昔於一時世尊住於釋種彌周吒村我從世尊聞如是義我今多住空三昧我爲善受持憶念如是說不佛告阿難如汝所言善受持憶念如我所說而無

有異問曰若善受持不應生疑若生疑者不名善受持答曰以是事故名善受持所以者何不生邪見不轉教餘人不敢忘失故問曰如長老阿難多聞總持一切智所說八萬法聚以正念器盛之何故於一句中而生疑心答曰聞此法時心有愁惱害諸釋時是此論因緣如愚癡瑠璃王殺害諸釋

爾時阿難將一比丘入迦毗羅城此城本時如諸天城當是之時其猶丘塚所有樓觀却敵埤堦種種窟牖皆悉毀壞清泉諸池悉皆燒濁鴻鴈鴛鴦孔雀鸚鵡鷓鴣翅羅鳥爲烟火逼皆飛翔虛空諸小男女皆啼

哭逐阿難後作如是言大德阿難我母命過我父命過我父母命過爾時長老阿難復至修迦羅處梵志精舍愚癡瑠璃王於其處理迦毗羅諸釋半身在於地中以鐵未未之殺七萬七千賢聖爾時阿難見是事已極生愁惱復次世尊諸根無異其心安住不動如山善御其心如持油鉢制伏五根如馬正視入迦毗羅城爾時長老阿難觀世尊面顏色和悅見已作是念如我親族離別生處毀壞世尊不爾我今苦惱而世尊心不動如山爾時世尊知阿難所念而告之言我多住空三昧故汝心住村落想處我住阿練若

想汝作親族想處我作凡人想汝作衆生想處我作
滿足法想爾時世尊知阿難及諸比丘不堪行道便
將諸比丘漸次遊行到舍衛國東方精舍彌迦羅母
堂爾時長老阿難愁惱轉增往詣佛所頭面禮足而
白佛言廣說如上以是事故阿難問此事時心有愁
惱聞佛所說我常住空三昧所以生疑問曰佛說我
多住空爲住何空答曰或有說者住無所行空所以
者何無所行空隨順四威儀法行時餘三威儀空餘
威儀時亦爾評曰應作是說住性空所以者何但觀
法性故是故阿難比丘若欲多住空者當觀聚落及

衆生住阿練若想時諸比丘皆有是念此住空法是
佛不共法佛爲除比丘心所疑而告阿難若比丘欲
多住空三昧者除聚落及衆生想住阿練若想問曰
何故佛告比丘除此二想答曰以諸比丘於此二想
生苦惱故阿難若比丘除聚落想及衆生想住阿練
若想當作地想乃至作非想非非想處想問曰何故
世尊一切時除下想說上想不說其根本耶答曰此
說是舊法過去恒沙諸佛說法皆爾復次欲令所說
不亂故若世尊說不除下想便說上想者則所說法
亂諸佛說法而無有亂復次欲離重說法過故若世

尊不除下想說於上想則是重說法諸佛世尊不重
說法復次定是略要法若世尊一切時說根本者則
經文多復次欲現論義道故論義之道若有所說必
定其言若重定前言則壞論義道佛是無對論師善
知論義道故問曰說村落想爲現何事乃至說非想
非非想處爲現何事答曰村落想爲現迦毗羅想衆
生想者現諸釋想阿練若想者現尼拘陀精舍想亦
現諸比丘行道處想地想者現觀色是散壞想所以
者何有色故有截手足耳鼻苦空想者現觀空想乃
至非想非非想處現觀非想非非想處想復次村落
想者是十五我所見衆生想者是五我見阿練若處
想者是空三昧地想者是所緣彼諸對治是無色定
復次村落想者是欲界器世界衆生想是欲界衆生
世界阿練若想是初禪二禪地想是第三第四禪彼
諸對治是無色定復次村落想是欲界所以者何欲
界說各村落如偈說

若伏村落刺 亦無罵繫害 苦樂心不動
是名爲比丘

衆生想是初禪所以者何彼中有尊卑眷屬故阿練
若想是第二禪所以者何第二禪是賢聖默然法故

地想是第四禪所以者何彼中有勝處一切處故彼諸對治是無色定阿難是名入無上空所謂盡漏不多用功心得解脫

問曰云何多用功心得解脫不多用功心得解脫答曰時解脫多用功非時解脫不多用功復次五種阿羅漢各多用功不動阿羅漢不多用功若依未至中間三無色定所得解脫各多用功若依根本禪所得解脫各不多用功

復有三三昧謂空空三昧無願無願三昧無相無相三昧云何空空三昧答曰如施設經說若比丘觀有漏取行是空此有漏取行空中無有常不變易法空無我無我所作如是思惟時復更生心心數法觀前思惟心是空是中無有常不變易法空無我無我所譬如有人欲燒十木百木千木聚以爲積然火燒之復捉長竿在邊其中若有墮落不燒者以長竿聚之知木已燒所捉長竿亦投火中行者亦爾先觀有漏取行是空廣說如上云何無願無願三昧答曰若比丘觀有漏取行是無常是變易法如是思惟時復更生心心數法觀前思惟心亦是無常變易法如人燒木廣說如上比丘亦爾觀有漏取行是無常乃至廣

說名無願無願云何無相無相三昧答曰若比丘
觀寂滅法此是妙離所謂盡愛離欲滅盡涅槃作是
思惟時復更生心心數法觀前思惟心亦是寂滅乃
至廣說如上名無相無相阿毗曇者作如是說空
三昧觀五取陰是空次空空三昧卽觀空是空汝
空亦空無願三昧觀五取陰是無常後生無願無願
三昧觀前無願汝無願亦是無常無相三昧觀寂滅
涅槃後生無相無相三昧觀前無相三昧非數寂滅
汝無相三昧非數滅無三相故亦是寂滅譬如旃陀
羅燒死屍時手執長杆繞其邊行若其中有墮落者

當以此杆聚之如其燒盡亦以長杆投之火中空三
昧亦爾觀五取陰是空後生空空三昧觀空三昧汝
亦是空無願無相說亦如是

問曰云何得此三昧答曰或有說者是見道邊得如
見道邊等智或有說者離欲界欲時如變化心評曰
應作是說若應得三昧者離非想非非想欲時得作
方便現在前

問曰幾智後起此三昧現在前答曰四法智比智苦
智滅智總而言之四智後欲界者三智後法智苦智
滅智色無色界亦三智後比智苦智滅智若是欲界

空空等三昧依未至禪所攝無漏道後起現在前非
想非非想處者無所有處所攝無漏道後起現在前
餘者卽自地無漏道後起現在前

界者在三界地者在十一地所依身者依欲界身行
者空有二行空空有一行唯空行問曰何故空二行
空空唯一行耶答曰以在行空行空三昧後生故復
次此行與有相違能捨生死此善根能觀無漏是過
患何況生死問曰何故不行無我行答曰若見諸法
無我不見空者雖厭離生死其心不勝若見諸法空
則厭離生死心勝如人在道獨行之時不大愁懼若

共伴行離別之時則大愁懼彼亦如是無願行十行
無願無願唯行無常行問曰何故無願行十行無願
無願唯行無常行答曰以在行無常行無願後生故
復次此行與有相違能捨生死此善根能觀無漏道
是過患何況生死何故不行苦行答曰不觀道作如
此行何故不行習等行答曰若行習等行則觀聖道
是有相續法故何故不行道等四行答曰若行道等
行則適可聖道不名過患無相行四行無相無相行
止行問曰何故無相行四行無相無相行止行答曰
以在行止行無相後生故問曰何故不行滅行答曰

滅有二種有非數滅有無常滅不知爲緣何滅何故不行妙行答曰波伽羅那說云何妙法無漏無爲法彼是中法是故不行妙行問曰何故不行離行答曰波伽羅那說云何離法答曰欲界繫善戒色無色界出要善定學法無學法及數滅彼無有是一相緣者空空無願無願或有說者緣最後聖道剎那或有說者緣最後聖道剎那俱五陰或有說者緣一生中聖道或有說者緣一生中聖道俱五陰無相無相緣非數滅念處者是法念處智者與等智俱定者卽是定根者總而言之與三根相應世者在三世緣世者空

空無願無願若作是說緣最後聖道剎那者過去現在緣過去未來最初當生者緣現在餘未來剎那緣三世若作是說緣一生中聖道者空空無願無願二俱緣三世無相無相緣非世善不善無記者是善緣善不善無記者空空無願無願緣善無相無相緣無記繫者是三界繫緣三界繫不繫者緣不繫是學無學非學非無學者是非學非無學緣學無學非學非無學者空空無願無願緣無學無相無相緣非學非無學是見道斷修道斷不斷者是修道斷緣見道斷修道斷不斷者緣不斷緣名緣義者是緣義緣自身

他身非身者空空無願無願緣自身無相無相緣非身

問曰何處起是三昧答曰於欲界中非色無色界趣者是人趣中非餘趣人中三天下非鬱單越依男身女身者俱能瞿沙跋摩作如是說唯闍浮提非餘方依男身非女身所以者何此善根依牢固身女人身身弱評曰如前說者好所以者何男子心得自在定得自在女人亦心得自在定得自在爲是學人爲是無學人者是無學人時解脫非時解脫者是非時解脫所以者何何等人能起此定謂於定自在身中無

煩惱信解脫人不於定得自在亦不身中無煩惱見到雖於定得自在不身中無煩惱時解脫雖身中無煩惱於定不得自在非時解脫身中無煩惱於定得自在問曰何者是三昧爲初剎那是後相續者是若初者是餘何所爲若後相續者是識身經所說云何通如說頗法是世俗有漏是取取陰所攝從內起因慧生是善是欲界繫次聖道生緣無漏是不共法唯聖人不共凡夫耶答曰有欲界繫空空無願無願無相無相是也答曰應作是說初剎那是問曰若然者餘剎那爲是何耶答曰是似彼善根復有說者相續

者盡是問曰若然者識身所說云何通答曰初者是
聖道次第緣無漏餘者雖非聖道次第亦緣無漏
問曰何時起此三昧現在前答曰般涅槃時阿羅漢
欲般涅槃時從聖道起已起此三昧現在前從此三
昧起已便般涅槃更不復起更不復起聖道評曰應
作是說得此三昧已欲用便起現在前問曰聖道後
起此三昧現在前此三昧後復起聖道現在前不耶
答曰或有說者不起所以者何此三昧憎惡聖道故
復有說者能起問曰若能起者云何名憎惡聖道答
曰此三昧雖復憎惡聖道不如聖道憎惡於有聖道
後猶起有漏心何況此定後不起無漏心耶然聖道
次第起此定此定次第不起無漏心此定唯是有漏
問曰云何此定何以唯是有漏答曰以不斷結故
問曰聖人何故修此定耶答曰以四事故修一欲住
現法樂故二欲遊戲故三欲觀本所作故四受用聖
法故復次此定是勝法聖人欲遊此定故

阿毗曇毗婆沙論卷第七十

阿毗曇毗婆沙論卷第七十一

迦旃延子造

北涼沙門浮陀跋摩共道泰譯

智健度八道品第一之一

佛說學人成就八種學道迹漏盡阿羅漢梵行已立成就十種無學道學人八種學道迹幾成就過去幾成就未來現在漏盡阿羅漢梵行已立十種無學道幾成就過去幾成就未來現在如此章及解章義此中應廣說優波提舍問曰何故作此論答曰爲止於世中愚言無過去未來世成就說現在世是無爲法

者意故亦明過去未來行成就是實有法若過去未來行非實有者則無成就不成就過去未來行者如第二頭第三手第六陰第十三入無有成就不成就者以有成就過去未來行故如過去未來行是實有法復有說所以作論者或有說成就非實有法如譬喻者尊者佛陀提婆說成就無體非實有法所以者何若衆生不離彼法名爲成就然不離是分別相待和召法無有實體如五指聚名之爲拳散則非拳若衆生不離彼法名爲成就若離彼法不名成就問曰彼何故作如是說答曰彼依佛經說轉輪王成

就七寶彼爲成就他身法及非衆生數法耶若轉輪
王成就輪寶神珠寶者則壞法體所以者何亦是衆
生數亦非衆生數故若成就象馬寶者則壞趣所以
者何亦是人趣亦是畜生趣故若成就玉女寶者則
壞身所以者何亦是男身亦是女身故若成就主藏
主兵臣者則壞業所以者何亦是尊貴亦是卑賤故
欲令無如是過故說成就無有實體欲止如是說者
意亦明成就有實體若成就無實體者則違此經如
說學人成就八種學道迹漏盡阿羅漢梵行已立成
就十種無學道聖人有漏心現在前時成就過去未

來現在無無漏道故則不成就復違餘經如說此人
成就善法亦成就不善無記法若善法現在前時則
離不善無記法不應成就不善法現在前時則離善
法無記法不應成就無記法現在前時則離善不善
法不應成就復違餘經如說比丘成就七法於現法
中多住喜樂若修方便必能盡漏無有比丘成就七
法者於七法中若起一一法現在前則成就一法若
起餘法現在前於七法中則不成就復違餘經如說
如來成就十力無有如來成就十力者若成就一力
若不成就如來於十力中若起一一力現在前則成

就一力所以者何於一剎那中無兩慧並現在前何
況多若起餘法現在前則不成就力復有餘過凡夫
人可言離三界結離三界結人可言凡夫人凡夫人
可言離三界結者凡夫人善不隱沒無記心現在前
時則不成就過去未來現在三界結應是離三界欲
人離三界欲人是凡夫者阿羅漢起善有漏及不隱
沒無記心現在前時則不成就過去未來現在無漏
法以不成就無漏法故應是凡夫欲令無如是過故
說成就是實有法問曰若成就是實有法者譬喻者
所引經云何通耶答曰轉輪王於七寶中得隨意自

在用故世尊說名成就復有說所以作論者或有說
成就是實有法不成就非實有法爲止如是說者意
亦明不成就就是實有法若不成就非實有者成就亦
非實有所以者何因不成就故施設成就如因明有
闇因夜有晝因寒有熱因不成就有成就亦爾復次
不成就與成就是兩兩近相對法如貪與不貪恚與
不恚癡與不癡是兩兩近相對法彼亦如是復次若
不成就無實體者則無施設有斷煩惱法所以者何
聖道生時斷於煩惱非如以石磨香聖道生時斷煩
惱得證解脫得故名斷煩惱復有說所以作論者或

有說聖道是無爲法如毗婆闍婆提說聖道是無爲法彼作是說阿耨多羅三藐三菩提道是一常住法諸佛出世盡覺悟此道譬如莊嚴象馬之乘多人更乘人人雖異而乘常一如是阿耨多羅三藐三菩提道是一常住諸佛出世皆悟此道諸佛雖異其道常一問曰彼何故作如是說答曰依於佛經佛經說我得過去諸仙所得舊道以佛說道是舊法故言是無爲爲止如是說者意故亦明道在世中若道在世必是有爲非是無爲所以者何無有無爲法在於世者若道是無爲法者則違此經如說毗舍佉優婆夷注

詣檀摩提那比丘尼所作如是問道爲是有爲爲是無爲耶彼作是答毗舍佉優婆夷道是有爲非是無爲問曰若道是有爲非無爲者毗婆闍婆提所說經云何通答曰以五事同故說名舊道一以方便同二以地同三以行同四以境界同五以所作同方便同者如一佛於三阿僧祇劫滿足六波羅蜜諸佛亦爾地同者其道盡在第四禪地行同者盡行十六行境界同者盡緣四諦所作同者如一佛以道滅煩惱一切佛亦爾以此義通彼經若如經所說不依義者卽此經中說我曾過舊城舊村城村可是無爲法耶雖

說城村是舊而非無爲道亦如是雖說舊道而非無爲如偈說

若斷欲無餘 如蓮華在水 比丘離彼此

如蛇脫舊皮

蛇皮可是無爲法耶如是蛇皮雖說是舊而非無爲道亦如是是故爲止他義欲顯已義亦欲說法相相應義故而作此論

八種者正見乃至正定成就者問曰誰成就爲法成就爲人成就耶若法成就一切法無所欲云何成就若人成就於實義中人不可得若無有人云何成就

答曰應作是說成就非法非人實義中有成就不成就而無成就不成就者實義中有縛有解而無縛者解者有煩惱有出要而無煩惱者出要者有生有死而無生者死者有業有業報而無作業受業報者有道有道果而無修道證道果者於實義中有成就不成就而無成就不成就者或有說者法成就問曰若然者眼入成就十一入十一入亦成就眼入耶答曰若作是說眼入成就十一入十一入成就眼入而無過評曰應作是說成就非法非人然四陰五陰生時有如是相似得名成就不成就尊者和須蜜說曰一

切法無所欲於無所欲法中有何成就不成就者問曰若然者佛經云何通如說此人成就善不善法答曰此是如來隨俗言說而無有實問曰云何是成就義尊者須蜜答曰不斷義是成就義問曰若然者具縛凡夫於一切法不斷盡成就耶答曰不也不得彼法故復次不棄義是成就義問曰若然者學人不棄無學法成就彼法耶答曰不也不得彼法故尊者佛陀提婆說曰得而不失義是成就義若得彼法不失是名成就問曰何故名學爲學學法故名學耶爲得學法故名學耶若學學法是學者定捷度所說云

何通如說學住自性若得學法是學者佛經云何通如說佛告尸婆迦學學法故名學答曰應作是說學學法故名學問曰若然者佛經善通定捷度所說云何通答曰彼中說得學法故名學人復有說者得學法故名學問曰若然者定捷度所說善通佛經云何通答曰佛經中說不捨期心不捨方便學人若住善不善無記心而不捨趣涅槃心故名學如人在道中路止息他人問言欲何所趣彼人答言欲趣某方其人以不捨去心故雖住言去彼亦如是學迹者問曰無學迹於學迹明淨勝妙何故但說學迹不說無學

迹耶答曰應說而不說者當知此說有餘復次此說
始起初入法者已說學當知亦說無學復次以所作
各各不同故學人以道迹所作勝無學人以解脫所
作勝如王與臣所作各各不同王以尊貴降伏所作
爲勝臣以執仗鬪戰所作爲勝彼亦如是復次學道
迹能斷煩惱猶如器仗能破怨敵無學不爾復次學
道迹能作斷煩惱方便及斷煩惱無學不爾復次數
數行義是道迹義無學不數數行故不名爲迹

學人成就八種道迹幾成就過去幾成就未來幾成
就現在答曰若依有覺有觀三昧有覺有觀三昧者

是未至及初禪問曰此中何者是依答曰或有說者
俱生故是依復有說者次第緣是依評曰應作是說
依彼二地起此法故名依初者有四種一得正決定
初二得果初三轉根初四離欲初得正決定初者依
彼二地得正決定得果初者依彼二地初得學果轉
根初者依彼二地信解脫轉根作見到離欲初者以
世俗道離欲依彼二地初起無漏道現在前此中依
四種初而作論隨相而說學見現在前問曰學人或
起非學非無學見何故但說學人學見現在前耶答
曰應作是說或學見現在前而不說者當知學人必

起學見不起非學非無學見如所說諸初刹那現在前無過去所以者何未有一刹那經生滅者設有生滅以得果轉根故而捨八未來成就修八現在成就若滅已不捨滅者是無常滅不捨者捨聖道有三種一得果二退三轉根若不得果不退不轉根卽依彼地滅已復起現在前問曰何故依彼地滅已復起現在前耶答曰學人依彼地共煩惱戰得勝破結怨敵念其恩故復起現在前如人著鎧執仗與怨共鬪旣得勝已其人後時以念恩故數數修治器仗而覆藏之不令毀壞彼亦如是復次以四事故重起現在前

一欲受現法樂故二欲遊戲故三欲觀先所作故四欲受用聖法故學第二刹那頃八成就過去是前刹那生滅者八成就未來是未來修者八成就現在是現在前者彼滅已不捨若依無覺無觀三昧學見現在前八成就過去是依有覺有觀地生滅者八成就未來是未來修者七成就現在是現在前者除正覺所以者何地無正覺故彼滅已不捨依無色定學見現在前八成就過去是有覺有觀地生滅者八成就未來是未來修者四成就現在除正覺正語正業正命彼地無故彼滅已不捨若入滅定若起世俗心現

在前八成就過去是有覺有觀地生滅者八成就未
來是未來修者現在無若入滅定是時無心有心者
能修道若起世俗心現在前彼心是有漏此中但說
無漏道種若依無覺無觀三昧無覺無觀三昧是第
二第三第四禪問曰此中何故不說中間禪耶答曰
應說而不說者當知此說有餘復次已在後所說中
故所以者何更無異種與第二第三第四禪種同故
依義如先說初者有四種如先說學見現在前如先
說初剎那不成就過去如先說八成就未來七現在
如先說彼滅已不捨如先說復依無覺無觀三昧學

見現在前第二剎那頃七成就過去是依無覺無觀
地生滅者八成就未來七現在如先說彼滅已不捨
依無色定學見現在前七成就過去是無覺無觀地
生滅者八未來四現在成就如先說彼滅已不捨入
滅定若起世俗心如先說彼滅已不捨依有覺有觀
三昧學見現在前七成就過去是無覺無觀地生滅
者八未來八現在成就如先說若依無色定無色定
名空處識處無所有處依者如先說初者四種初如
先說此中依離欲初而作論非得正決定初所以者
何無有依無色定得正決定者非得果初所以者何

無有依無色定得學果者非轉根初所以者何無有
依無色定轉學根者以世俗道離下地欲後依彼地
初起無漏道現在前最初剎那無過去八未來四現
在成就如先說問曰如世俗無色定非不因世俗禪
無漏無色定非不因無漏禪世俗禪是世俗無色定
方便所依門無漏禪是無漏無色定方便所依門何
故說無過去耶答曰道種或有在禪地者或有在無
色地者彼雖起在禪地者未起在無色地者是故無
過去滅者是無常滅不捨者捨聖道有三種如先說
依彼地生滅聖道復起現在前問曰何故依彼地生

滅聖道復起現在前耶答曰以念恩故廣說如上第
二剎那頃四成就過去是依無色定生滅者八成就
未來是未來修者四成就現在是起現在前者除正
覺正語正業正命彼地無故彼滅已不捨若入滅定
若起世俗心現在前四成就過去八成就未來現在
無如先說彼滅已不捨依有覺有觀三昧學見現在
前四成就過去是依無色定生滅者八成就未來是
未來修者八成就現在是起現在前者問曰無色定
次第能起有覺有觀三昧耶答曰不能此說說次第
不說定次第此說隨順不說定隨順彼滅已不捨依

無覺無觀三昧學見現在前四成就過去是依無色
定生滅者問曰過去有八是依有覺有觀三昧生滅
者何故說四耶答曰此中一切處唯說最初生滅者
八成就未來是未來修者七成就現在是起現在前
者除正覺彼地無故問曰此中說何等學人答曰此
中說習學次第入一切定猶如登石上梯者先入有
覺有觀三昧次入無覺無觀三昧次入無色定次入
滅定次起世俗心說如是學人若先入有覺有觀三
昧次入無覺無觀三昧次入無色定次入滅定不起
世俗心不說如是學人餘如雜捷度人品中廣說十

二支緣端正女人喻

有四種道一苦遲慧道二苦速慧道三樂遲慧道四
樂速慧道問曰應說一道謂盡苦道盡生死有道盡
老死道應說二道一盡色道二盡名道應說三道一
盡欲界道二盡色界道三盡無色界道應說五道謂
盡色道乃至盡識道應說十一道謂盡老死道乃至
盡行道若以在身若在剎那則有無量無邊道何故
世尊於一道廣說四道於無量無邊道略說四道云
何施設立四道耶答曰以三事故一以地二以根三
以人總而言之以三事應以二事或以地以根或以

地以人。以地以根者。依未至中間三無色定。鈍根人所行道。是名苦遲慧道。即依此地。利根人所行道。是名苦速慧道。依根本禪。鈍根人所行道。是名樂遲慧道。即依此禪。利根人所行道。是名樂速慧道。是名以地以根。以地以人者。依未至中間禪三無色定。堅信信解脫時。解脫人所行道。是名苦遲慧道。即依此地。堅法見到。非時解脫人所行道。是名苦速慧道。依根本禪。堅信信解脫時。解脫人所行道。是名樂遲慧道。即依此禪。堅法見到。非時解脫人所行道。是名樂速慧道。是名以地以人。

問曰。四道體性。是何。答曰。是五陰。四陰性。若在禪地。是五陰。在無色定。是四陰。此是四道體性。我相物分。已說體性。所以今當說何。故名道道。是何義趣。向正義。是道義趣。向涅槃地。義是道義。苦遲慧道者。問曰。無漏道。非苦受。不與苦受相應。何故名苦。耶。答曰。諸邊無色道。難生。故名苦。根本禪道。易生。故名樂。云何。諸邊無色道。難生。耶。答曰。欲界煩惱及業繫縛。故多用功。乃生。未至禪。如人被縛。多用功力。乃能自解。彼亦如是。或有修不淨觀。生彼地者。或有修安那波那念。生彼地者。修不淨觀者。或於十年。或十二年。中常

觀白骨或有能生彼地者或不能生者修安那波那
念者若於十年若十二年中常數息或有能生彼地
者或不能生者已離欲愛不多用功能起初禪現在
前初禪異心心數法滅異心心數法生滅麤心細
心覺俱心滅觀俱心生如人以木析木多用功然後
乃析初禪亦爾異心心數法滅異心心數法生麤心
滅細心生覺俱心滅觀俱心生已離初禪欲不多用
功起第二禪現在前第三第四禪亦如是問曰離第
四禪欲亦不多用功起無色定現在前何故名苦道
耶答曰無色定是微細法或有言無無色定者如多

毗婆居士往詣尊者阿難所作如是問尊者阿難我
是在家之人長夜樂著色聲香味觸聞說無色衆生
心生怖畏如臨大坑云何名衆生而無有色根本禪
是樂道如二人俱至一方一從水道一從陸道雖俱
至一方從水道者樂非陸道者諸衆生離欲亦如是
或依諸邊無色定或依根本禪雖俱得離欲依禪者
樂非諸邊無色定復次有二種樂故名樂謂受樂猗
樂三禪中有猗樂受樂第四禪雖無受樂而猗樂多
勝餘地二種樂復次有二種樂故名樂謂舊樂客樂
舊樂者住禪起禪現在前客樂者住禪起無色定現

在河餘說禪樂相如上四禪中廣說問曰何故名遲
答曰以得此道不能速至涅槃城故名遲問曰何故
名速答曰以得此道能速至涅槃城故名速問曰若
不速至名遲疾至名速者有信解脫人速至勝見到
者若信解脫人精勤見到人不精勤則信解脫人速
有所至非見到者如偈說

不放逸放逸 睡眠寤寐者 猶如利鈍馬

前發者先至

猶如二人俱至一方一乘疾馬一乘鈍馬雖乘鈍馬
以前發故先有所至如是信解脫人勤行精進先至

涅槃見到人不勤精進故後至涅槃答曰此中說等
行精進者若等行精進見到者則先至問曰此四道
是四陰五陰性何故說名慧耶答曰此道雖是四陰
五陰性以慧偏多故名慧道如見道是五陰性以見
偏多故名爲見道見道邊等智是五陰四陰性以智
偏多故名智金剛喻定是五陰四陰性以定偏多故
名定四道亦爾是五陰四陰性以慧偏多故名慧道
云何苦遲慧道如經說比丘狀惡五取陰是名苦遲
慧道問曰此道緣四諦何故世尊唯說緣苦諦耶答
曰應說緣四諦而不說者當知此說有餘復次此說

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

始初入法爲說緣苦諦當知亦說緣餘諦復次佛經說四道方便不說四道體四道方便道中作如是狀惡觀集法經中復說云何苦遲慧道答曰非根本禪所攝鈍五根是也云何苦遲慧道答曰非根本禪所攝利五根是也云何樂遲慧道答曰根本禪所攝利五根是也云何樂速慧道答曰根本禪所攝利五根是也問曰此道是五陰四陰性何故但說是根耶答曰此中說最勝者五根性是巧不能成大事故問曰爲有中根不若有者此中何故不說耶若無者佛經云何通如說諸衆生隨世而生隨世而長有下根者

有中根者有上根者其上根者煩惱微薄易可教化若不聞法則退失善根答曰應作是說無有中根所以者何見道有二種一堅信道二堅法道修道中亦有二種一信解脫道一見到道無學道中亦有二種一時解脫道二不時解脫道以無第三道故無有中根問曰若然者佛經云何通答曰受化見聖諦者或有在初或有在中或有有在後在初者名利根在中者名中根在後者名下根復次受化見聖諦者有近有遠或有不近不遠者近者是利根如憍陳如等遠者是鈍根如須跋陀羅等不近不遠是中根如舍利弗

曰捷連等復有說者有中根問曰此中何故不說耶
答曰已說在先所說中若說下根時中根則在上根
中若說上根時中根則在下根中是故尊者瞿沙作
如是說中根爲在何處答曰在下中所以者何上中
下者名中復次在上中所以者何下中上者名中復
次俱在二中評曰如是說者好所以者何佛亦是堅
法人辟支佛亦是堅法人聲聞得波羅蜜者亦是堅
法人彼根盡等耶以於一道有三種根故經作是說
以無第三道故阿毗曇者則說無中根是故二說善
通集法經復說修行廣布苦遲慧道能滿足苦速慧

道修行廣布樂遲慧道能滿足樂速慧道問曰此說
何者滿足爲說滿足根爲說滿足離欲耶若滿足根
者苦遲慧道則滿足二速慧道樂遲慧道亦滿足二
速慧道若滿足離欲者則遲道滿足遲道速道滿足
速道答曰應作是說滿足根所以者何彼經說相似
法滿足不說不相似法滿足苦道與苦道相似樂道
與樂道相似

問曰誰成就幾道答曰或一或二誰一耶答曰未離
欲界欲鈍根者成就一苦遲道已離欲界欲成就二
謂樂遲道未離欲界欲利根者成就一苦速道已離

欲界欲成就二謂樂速道尊者僧伽婆修說曰有盡成就四道者如依根本禪轉根住無礙道時不捨二鈍道已得二利道不應作是說所以者何若作是說則壞根壞人壞根者亦是鈍根亦是利根壞人者亦是信解脫亦是見到

阿毗曇毗婆沙論卷第七十一

音釋

楯食尹切與肴同兵器也

髮莫班切

杭古行切不粘稻也

埤埤匹切埤研

刺切七自

惘扶紡切

鎧苦亥切

鸚鵡文甫切鳥名

耒力對切耕田具也

未力對切耕田具也

刺切七自

惘扶紡切

鎧苦亥切

鸚鵡文甫切鳥名

耒力對切耕田具也

未力對切耕田具也

刺切七自

金沙弟子張培原助資刻此
阿毘曇毘婆沙論經第七十一卷計字一
萬三千一百八十六個該銀五兩九錢三分三
厘爲所
河南姚鶚師壽算綿遠福德並臻
崇禎己巳歲孟秋月金沙顧龍山識

9
170
1
2
3
4
5
6
7
8
9
180
1
2
3
4
5
6
7
8
9
190
1
2
3
4
5
6
7
8
9

五

四

三

二

金
一
二
三
四
五
六
七
八
九
十
十一
十二
十三
十四
十五
十六
十七
十八
十九
二十
二十一
二十二
二十三
二十四
二十五
二十六
二十七
二十八
二十九
三十
三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十
五十一
五十二
五十三
五十四
五十五
五十六
五十七
五十八
五十九
六十
六十一
六十二
六十三
六十四
六十五
六十六
六十七
六十八
六十九
七十
七十一
七十二
七十三
七十四
七十五
七十六
七十七
七十八
七十九
八十
八十一
八十二
八十三
八十四
八十五
八十六
八十七
八十八
八十九
九十
九十一
九十二
九十三
九十四
九十五
九十六
九十七
九十八
九十九
一百

ツ
ノ
サ
四